


DYAMBWIBWA

 Dyâpà dya muneemu mu—mu Yuma, ndyèsè dinene dya kupeta dibiikila edi bwa kwalukila cyakabidi. Tuvwa bapicile mu cikondo cya dicyonkomoka cilenga cya dikema, musangu mushaale mwaba ewu. Ne pashiishe pângàalu kuumvwa ne bivwa bikengela mêmè kwalukila cyakabidi, kadi kungenzabi bilenga bya kacya, bwa kuteeleja majaadiki ne mêyì malenga a kudi bantu aa, ne ciine aci's cidi cikukankamikaku ndambu.

² Billy mmungambile ne mwaneetu wa balume wa ku Las Vegas awu, wa bwena uvwa ujinga disangisha mu dyâpà kampana kwôkò aku awu, bwa kumumona dyakamwe paanyima paa disangisha dimane kujika kaaba aka. Tudi ne cikondo, mudiye wamba, citudi mwa kubwelela, mu ngondo wa kumpala amu, kumpala kwa disangisha dya mu Phoenix, nwamonu's, bwa kulwa ku Las Vegas. Pa nanku twètù biine's tutu anu misangu yònsò bajingejinge bwa kukufika.

Ngeela meeji ne Mwaneetu Art Wilson uvwa musòmbèle kuntwaku, kukaadi ntanta mule, anyi udi mwa kwikala ucidiku. Nenku yêyè—yêyè uvwa mundombe bwa mêmè kukuya, yêyè ne Mwaneetu wa bakaji Wilson. Ncyakapeta mpunga to, nanku pàmwâpa eci ki cìikalà cikondo cya mêmè mufwanyine kulwa.

³ Monanganaayi anu ne Billy Paul anyi ne Mwaneetu Roy Borders. Ngeela meeji ne yêyè udi kaaba aka mu mwaba kampana. Muntu mukwabo uvwa wamba ne Mwaneetu Roy uvwamu. Mwaneetu Pearry, Lee, anyi umwe wa ku bôbô abu, nebiikale ne mushindu wa kukwambila. Longololaayi anu matuku a ngondo a twètù kulwa.

⁴ Mpindyewu, ngãmònu bambi bààbûngì mwab'ewu, kwênjì katanci, bwalu's ndi ne disanka dîngì dya kutwilanganaku ne bânà beetu. Mvwa mwa kujingaku bwa kupeta cikondo, cya kuya neenu ku meènù, bwalu ndi mumanye ne nudi ne balâmbi baa byakudya batambe bwîmpè bàdiku mu ditunga emu. Aci's ncîmpè.

⁵ Nenku mpindyewu, Mwaneetu Pearry mmupete bushuwa maalu abidi, diloolo edi, a dimudyula naawu. Udi ne maalu abidi a dimudyula naawu patudi twakulangana apa. Bumwe bwa ku ôwò, mmukose cikolokolo cyacya, cidi aku aci. Dibà adi, wêwè ngudi—wêwè ngudi mwambule dipiila dya bwalu abu, Mwaneetu Pearry. Ncyêna ngeela meeji ne wêwè nguvwa menemene mupiile to. Kadi wêwè. . . Muntu kampana ukaavwa mudilongolole bwa kwakula. Aci kaayi's civwa cilenga's.

⁶ Nenku ki pashiishe, cyakabidi, kuyaye kwaka ne ukaavwa wakula. Kwambaye ne: "Ambaaku tûng!" Mwikale wambila

Mwaneetu Collins anyi umwe wa ku bôbò abu. Yêyè ne: “Didya dya diloolo’s divwa dilenga. Kadi,” mwakambaye, “nya’ nkwambila’s,” yêyè ne, “muntu awu udi ne cya kwikala mwena Espagne, anyi cintu kampanda, anyi mwena Mexique. Wawa’s uvwa nndungu mutambe kutwa wa kacya mêmè ngâlábula ndungu’s.” Utungunuka mushindu awu, pende mwikale wakula ne mulàmbi wa dipòkò’s.

Awu ne: “Mêmè’s ki mulàmbi wa dipòkò awu.”

⁷ Awu’s n’Texas, bwenu nwênù. Twêtù netumulongolole, muneemu mu Arizona, paanyima paa cikondo, (kî mmwômò anyi?), bu yêyè mwa kushaala ku luseke lwetu.

⁸ Mbilenga bya dikema bwa kwikala kaaba aka! Ne ndi ngeela meeji ne abi kabyena bimweka bu bilele twela to, kadi mmapiku. Bwalu, Mukalenge Yêyè mwine’s uvwa welaku mapiku, nudi bamanye’s. Wakamba ne: “‘Heloode,’ ndaayi nukambile mukenge awu,” nwamonu’s, “leelu Ndi ngiipata—ngiipata badémons; maalaba Ndi muvwijiibwe mupwangane.” Pa nanku, Yêyè uvwa wela mapiku. Ee, aci kacyakutwenzela bibi to, mûndi ngeela meeji, ku musangu ne ku musangu.

⁹ Nenku mpindyewu dîbà dikaadi dipiteku ndambu. Nenku, pa ciibidilu, ntu—ntu nyiisha mêmè matwe ku anaayi. Pa nanku, bu mûndi mumanye nsômbelu wa bukalinga wa mwaneetu wa balume ne mwaneetu wa bakaji kaaba aka, mu dyâpà edi, netukosolojeku maalu, bwa diloolo edi. Nenku anu...Mvwa mwambile Terry. Mvwa mwambe... .

Yêyè kwamba ne: “Ncinyi...Kwela mukaba wa mêtù wa mêmè abidi anyi?”

¹⁰ Mêmè ne: “To, Terry. Eci’s—s’ndidya’s.” Mêmè ne: “Anu tusunsa tutwe ku makumi asatu anyi makumi anaayi cyanaana, bwa kwambila bantu cintu kampanda.” Bwa ne, ndi mufwanyine kuteetaku, nansha nanku, musangu wôsò, bu mûndi mumanye cyôci aci.

¹¹ Pâncivwà mwânà mutekete, bantu bavwa ne ciibidilu cya kulwa kunteeleja bwalu mvwa muiishi wa citende, mucikàle anu nsongaalume’s, wa citende. Nenku bavwa mwa kwamba ne: “Ee, Billy Branham, nudi bamanye’s, uciidi anu mwânà’s, kayiku mupicile mu tulaasa to, kayiku ne dilonga nansha dikese.” Kadi bavwa balwa kuteeleja myaku yanyi mikosoloke ayi, wanyi Anglais wa cyena Kentucky awu, nenku—nenku bôbò...byanyi bya ne “hit,” ne “hain’t,” ne “tote,” ne “carry” abi.

Byenze bu mu dimwe dya ku masangisha muneemu emu anu abidi adi panshi aa, kwambabo ne: “Netujuukaayi bônso kuulu bwa twêtù kwimba musambu wa ditunga.”

¹² Mêmè kjuuka kuulu e kwamba ne: “Bwa nzubu wanyi wa kale wa ku Kentucky kule kwaka.” Ki ditunga dimwepele

dîmvwàku paanyi mumanye ndyôdi adi, nenku ki cyôci aci civwa musambu wa ditunga, bwa ku dyanyi paanyi dimanya.

¹³ Pa nanku mpindyewu, paanyima paa wêwè mumane kwikala muntu mukole, nansha nanku, mona's, twêtù. . . wêwè ubwela, bikengela wikale ne cikwabo cintu kampanda cya cipite aci's. Nwamonu anyi? Tudi twangata. . . Pôlò wakamba, ne: "Pâncivwà mwânà, mvwa ngaakula bu mwânà ne ngeela meeji bu mwânà." Udi wenza maalû bu mwânà's. Kadi paukaadi wenda makola, pa dîbà adi udi ubanga, kuumukila ku dyambula dya makàsà ebe a kumpala, nenku utetuka udishinda, ujuuka bwa kuteeta cyakabidi. Pashiishe wêwè, paanyima paa cikondo, udi ufika mu mashindu wa ukaadi wenda ulonda mulongo mululame. Nenku cyôci aci ki cidi cikengela twêtù kwenza, bu masalaayi a nkuruse. Mpindyewu ki cikondo cya kwenda kulonda mulongo mululame ncyôci eci, twenda tupweka buludi mu cibeeba cîyaaya ku Butumbi aci.

¹⁴ Ndi bulelela ngiitabuuja ne tukaadi ne mwoyi mu bikondo bya ndekeelu bya maalû malonda a buloba ebu. Mêmè ndi cya bushuwa ngiitabuuja ne Dilwa dya Mukalenge dikaadi diseemene bikole, pâmwâpa, kupita mutudi twêtù twela meeji. Pa nanku mpindyewu, mu tusunsa tutwe ku makumi asatu twa dîbà dyenu, anyi cintu kampanda, ndi muswe kukoka ntema yenu ku Mufundu wûndi muswe kukwata naawu mudimu bu cyena bwalu, ne—ne kwikala kuteelaku mikwabo kabidi mwaba ewu. Ndi . . .

Musômbe kwanyi kumbelu, dîngà dituku, mvwa ngeela meeji pa miine meeji aa. Pashiishe mêmè kudyambidila ne: "Ee, ncyèna mumanye, pândi ngaakula pa Mufundu wônsò ewu. Nêngàngatè anu citupa cyaWu, anu bwa tuumasangisha tukese twîpî twa bwena tutudi bafwanyine kwenza diloolo edi etu." Ndi njinga kwamba cintu cimwepele, panucidi nubuulula mu Misambu apu. Ya—ya kumpala. . . Misambu wa 27, ndi muswe kwangata mvensa yitaanu ya ntwadijilu ayi, bwa kubala.

¹⁵ Ndi muswe kwambaku nunku ewu, bwa bidi bitangila mâpà a Beena Kantu-ku-Byanza baa Evanjeeliyo mu Kaabujima aa.

Mwaneetu Pearry uvwa wakula bwa mikanda, ne bikwabo, ne bwa mikanda mipyamipya yidibo naayi. Mbanganyi badi bavuluka patwakapeta mukaba wa mêtî awu, ne patwakaciyiisha muneemu mu Phoenix emu, ku cimwe cya ku bibilu, pa *Bakalenge, Tudi Dîbà Kaayi?* Mpindyewu, aci civwa ntwadijilu wa mukanda awu, nudi numona's, dîbà divwa byôbi ebi. . . dyâkenzekà cyôci eci.

¹⁶ Kudi dishindika dya ditambe-mfukilu dipitepite bûngî dya Dîyî difunda dya Nzambi, dya dîbà edi, bwa cintu kampanda kaciyiku mwa kuseemenenangana neetu mpindyewu to. Tudi anu. . . Ncitambe kwikala cya bushuwa. Bintu binudi. . . Mbifwanyine kwikala bya bikemesha, bwenu nwênù, anu bwa

kunumanyisha ne ncinyi cidi munkaci mwa kwenzeka. Bààbûngî baa kunudi, nwênù beenyi, pàmwápa, nudi nuumvwa bantu aba bajuuka bamba—bamba mēyî a kadyuwu aa, pa ne: “Mukenji wa dîbà edi,” ne bikwabo. Kudibo biipacila bwa kafika aku, nku mulayi wa Nzambi wa dîbà edi, dyakalayaYe bwa civwaYe mwa kwenza. Ne nyewu tuMumona ushindika bilondeshile Mifundu anu menemene cyakambaYe ne Yēyè neēnzè, mu mushindu umweumwe awu. Bidyànjlila kwamba, byenzeka anu menemene mu byôbî, musangu wônsò, bwalu Nzambi ngudi ubyamba.

¹⁷ Muntu yēyè, nansha mwikale nganyi, bu yēyè mwa kuteeta kudyanjlila kwamba dîyî dya mushindu awu, bidi mwa kwenzeka musangu umwe pa miliyò dikumi. Bu muntu mwa kukwambila ne *cintu* kampanda necyenzeke, ne ncifwanyine—ncifwanyine kwenzeka pa *dîbà* kampanda; musangu umwe pa miliyò dikumi. Ne pashiishe *mwaba* mwine udici cifwanyine kwenzekela, ncifwanyine kwikala musangu umwe pa miliyò lukama.

Ne pashiishe *dîbà* didici cifwanyine kwenzeka, biyaaya anu kuya, ne *mushindu* wenzekaci, ne cyènzekà ciine *ncinyi*, ne bikwabo, s’ciyaaya mu mushindu wa muntu kayi mwa kudicinkilaci. Patudi tucimona cipwangane anu menemene, kantu ne kantu ne musangu wônsò, pa dîbà adi’s n’Nzambi.

Ne pashiishe tudi twalukila buludi mu Mifundu. Ncifwanyine kumweka cyenyi kutudi. Kadi twalukila buludi mu Mifundu, katuyi nansha bamanye ne paa kutangila piine mpenyi to, kadi Nyuma Mwîmpè ucipatula patooke ne utwangaja anu Dîyî dyônsò pamwe, wenza cimfwanyi mwaba awu bwa kutuleeja anu dîbà ditudi ne mwoyi. Tudi munkaci mwa kushintulula bipungu.

¹⁸ Tudi—tudi pa ditumba kampanda. Mbipeepele padi muntu wibaka ditumba, bwa mwibaki wa ne madyoto, wibaka ditumba. Ûdi ùbanga, bantu bônsò bateeka madyoto anu mu mulongo umweumwe awu, byenze mudi dingumba kampanda dibanga, ne dibanga kulonda mulongo, bidi anu bîmpè. Kadi, panukaadi nukafika ku matumba awu, kùdî kùkèngelà bwa nwênù kukudimuka ne kutangila luseke lukwabo aku’s!

Mpindyewu, cidi Nzambi munkaci mwa kwibaka kî ncimanu to. Yēyè udi wibaka nzubu, nwamonu’s, nenku kudi bikosolwedi ne matumba byàbûngî bikaavwaYe mudyanjlile kwamba mu Bible emu. Nenku matumba awu, muntu kana yônsò ewu mmufwanyine kuteeta kwenza ditumba, kadi’s bidi bikengela diikale bilondeshile dizola. Kabiya nanku to, bikengela bwa bôbò kucyupula cyakabidi.

¹⁹ Pa nanku tudi—tudi tutumbisha Nzambi bwa bwîmpè Bwende ne bwobumwe bwenu nwênù aba, ne biibi byunzulula bidi Mukalenge mutupeeshe, biine abi nku beena kantu-ku-byanza aba. Nkaadi misangu yônsò mulwâlwalwe mvita bwa kwamba ne mēmè—mēmè ncitu ngiitabuuja . . .ntu ngiitabuuja

bantu badi mu mangumba. Kadi nciitu ne dibà dyàbùngì dya kukankamika mangumba to, bwalu dyònsò dya kudiwu didi dyasa lupangu ludinyungulukile dyôdi nkayaadi.

²⁰ Nenku—nenku mbyenze anu bu, ngeela meeji, civwa nkaabwalu kakese katu Mwaneetu David mulonde, kaa muvwaye umuna mabata, ne kwambaye ne musulu kuulawu. Nenku dibata dyònsò, nudi bamanye's, avwa ajinga bwobumwe bwa ne dibata naadi, kadi kaâyikù mwa kubupeta to bwalu bavwa anu baàkàngile ònsò mu mpangu. Kadi mâyi mmenze anu abanda kuulu menemene anyi, kadi kulelemijawu mabata awu ne kuàpàtulawù mu lupangu.

Pa nanku mêmè—mêmè ndi ngeela meeji ne mushindu awu ki udi ukengela kucyenza. Mpadi anu mâyi àbànda kuulu, nwamonu's, nenku tupeta mushindu wa kupatuka mu lupangu ne—ne wa kubwela mu bwobumwe muntu ne mukwende, nudi bamanye's, kwikalaku ne dinanga dilelela dya Kilisto munda mwa myoyi yetu.

²¹ Nenku Beena Kantu-ku-byanza baa Evanjeeliyo mu Kaabujima aba batu bwanyi mêmè bu mwa—mwaba wa mâyi mu cipeela. Bwalu, misangu yàbùngì. . . Ntu ne bânà beetu, bânà beetu baa maalu mimpè, ngeela meeji, mu dingumba ne dingumba dyònsò dínkaadiku mutuutakeene naadi: ba-Presbytériens, ba-Luthériens, ba-Baptistes, beena Mpenta, mishindu yònsò mishiileshiilangane ya beena Mpenta, église de Dieu, ne ba-Nazaréens, ba-Pèlerins de la Sainteté. Bânà beetu baa maalu mimpè, myaba yònsò. Kadi, misangu yàbùngì, kabatuku mwa kungiitabila mu cisumbu cyabo to, bwalu, nwamonu's, kî nne kabeeba baciitabuuja to, kadi, nwamonu's, ncifwanyine kubakosolola ne dingumba dyabo. Ne paudi wenza aci, mu bushuwa bwa bwalu, aci—aci ki cidi cicikumbaja.

²² Mwaba ewu abidi adi panshi aa, kuvwa Mwaneetu wa ba-Méthodistes mulwe kùndì, ncyakuteela dínà dyende to. Muntu wa maalu mimpè, uvwa ufunda mukanda wa cibungu pa bidi bitangila dyondopa dya kudi Nzambi, ki kulwaye kùndì bwa muyiiki kampana—kampana. Twètù kusòmba e kuyiikila ndambu. Yèyè kwamba ne: “Twètù cintu cimwepele citudi tukubengela, utu anu mulamakanangane dibà dyònsò ne beena Mpenta abu.”

Mêmè ne: “Nanku, enzaayaaku's bwa ekeleeziya wa ba-Méthodistes acituudile mfranga. S'nêndwe.”

Apu ki ngonyoonyi kwandamunayi myadi's. Nwamonu anyi? Yèyè—yèyè kwamba ne: “Ee, mu bushuwa bwa bwalu, kî mmêmè—mêmè udi ekeleeziya wa ba-Méthodistes to. Mêmè ndi anu wa ku bôbò cyanaana.”

²³ Mêmè ne: “S'ki bwalu mbwôbò abu. Wamonu anyi? Bôbò abu, beena Mpenta biine abu, ki badi bunzulula biibi byabo. Wamonu anyi? Bôbò ki bândiku mwa kufika kudibo. Nenku

bûngì bwônsò bwa biibi bunzululabo abu, mona's, twêtù tudi badilongolole bwa kubwelamu.”

Mbyenze anu bu mu Bwakabuulwibwa, nshapita mwi3, mbambe ne: “Ndi mwimane ku ciibi nkookola. Muntu kana yônsò yêyê munzulule ciibi, Nêmbwelè ne nêndye didya dya diloolo.” Ne mwine awu's uvwa n'Yesu. Bwônsò bwetu tudi bamanye ne ùvwa n'Kilisto, ne Yêyè udi Dìyì. Ncya bushuwa. Yêyè udi Dìyì.

²⁴ Nenku Beena Kantu-ku-byanza baa Evanjeeliyo mu Kaabujima batu bu mwaba wa mâyì mu cipeela mutudi mwa kudisanga. Ekeleeziya nansha umwe katu ucituudila mfranga to. Bôbò bônsò, pamwe, ba—bantu bafumine mu maekleeziya, nenku tudi tudisanga ne twenza bwobumwe, buloba bujima, mu nyungulukilu myaba yônsò.

²⁵ Ne mêmè ewu nkaadiku mwambulwishe ku dijuula dya mâpà àbûngì, àbûngì, àbûngì pa buloba bujima, a Beena Kantu-ku-byanza baa Evanjeeliyo mu Kaabujima. Ndi ne kusakidila bwa mpunga uvwabo bampeeshe awu. Mwômò amu, beena kantu-ku-byanza nebacituudile mfranga. Pa dîbà adi, ekeleeziya yônsò, yidi—yidi miswe kulwa ayi, nansha bishi.

Kadi, pa dîbà adi, padiku . . . Mêmè ncitu musweku kuteeta kukoka muntu kampana bwa kuumusha ku ekeleeziya wende to. Wêwè shaala anu mu ekeleeziya webe awu kadi mwangalaja Bukênkè. Nwamonu anyi? Ikala mwena Kilisto mulelela. Mpaasata webe neakwanyishe. Munsantu mulelela, wa lulamatu, mushuwashuwale, muntu kana yônsò udi witabuuja Nzambi neanyishe muntu wa nanku. Eyowa.

²⁶ Mpindyewu, ndi ngeela mwaneetu ewu twasakidila, ne mukajende, ne dyâpà edi, bwa mpunga ewu. Nenku dyâpà edi didyundeku. Mabenesha a Nzambi ikaleku pa dyôdì, ne dyôdì diikaleku cyamu cya mudimu mu byanza bya Nzambi, bwa kusungila nkama ne nkama ya bantu kumpala kwa Dilwa dya Mukalenge; ne nwênù bônsò beena mâpà makwabo anyi baaminypala baa mâpà badi kaaba aka aba.

²⁷ Mu Mukanda wa Misambu, mpindyewu, ndi muswe kwakula pa cyena—cyena-bwalu cya pabwaci menemene, diloolo edi, anu bwa katanci kakese cyanaana. Ndi ne ndambu wa Mifundu mifunda kaaba aka. Nenku—nenku mvwa mwele pâmwâpa meeji ne, diloolo edi, mvwa mwa kwakula pa cintu kampana cya cishiilangane. Kadi, pa kumona mudi dîbà dyenda diya, mona's, ncivwa muswe kushaala ntanta buleyi nanku awu to, nanku ki mêmè kubuulula mwaba ewu ne kupeta ndambu mukwabo wa Mifundu. Nenku ndi muswe kwakula pa cyena-bwalu eci: *Dyambwibwa*. Nwamonu anyi?

²⁸ Mpindyewu, twêtù tudi twitabuuja ne nekwikale Dyambwibwa kampana. Beena Kilisto bônsò badi biitabuuja

aci, badi babadi baa Bible abu, badi biitabuuja ne nekwikaleku Dyambwibwa kampanda.

²⁹ Nenku mpindyewu bwa kubala bwa kupeta mwaba wa kushindamijila bitudi twamba, tudi tubala Musambu wa 25. Ndi muswe kwamba ne. . . Numfwileku luse. Musambu wa 27, mvensa 1 too ne ku 5.

MUKALENGE udi bukênkè bwanyi ne lupandu lwanyi; ûngààcìnà ki nganyi? MUKALENGE udi dikanda dya mwoyi wanyi; ûngàâpetelà bwôwà ki nganyi?

Beena lwonji, nansha beena lukuna baanyi ne balwishi baanyi, padibo bangicikidila pambidi bwa kudya mubidi wanyi, badi batetuka ne badishinda.

Nansha bu ne bivwa bikengela bwa cilwilu kwasaci cituudilu cinnyungulukile eku ne eku, mwoyi wanyi kawakucina to: nansha bu mvita mwa kunjaukila, mu cyôci eci ki mûngîikalà mweyemene.

Cintu cimwepele cîntu anu mujingejinge cya kudi MUKALENGE, ciine cîngîikalà ngenda nkebangana naaci; mbwa mpeteku mwa kwikala musòmbèle mu nzubu wa MUKALENGE matuku ônsò a mwoyi wanyi, bwa kwikala kubandila bulenga bwa MUKALENGE, ne kwikala kulomba mu ntempelu wende.

Bwalu mu cikondo cya lutatu yêyè neansokoke mu kazùbù kaa cûkishilu: ne mu mwaba musokome wa ntenta wende wa kusambakeena ki mwansokokaye; yêyè neanshikike pa lubwebwe.

Mukalenge asakidileku mabenesha Ende ku dibala adi dya Dîyî Dyende.

³⁰ Mpindyewu, leelu ewu, mu dyakula dya pa cyena-bwalu eci, mpindyewu bidi mwa kwenzeka ne bamwe beenu biikale ne mmwenenu mushiilangane, ne—ne misèèsù yîndî ngangata bwa kulonda. Kadi mbanganyi munda emu badi biitabuuja ne Bible udi ulongesha ne nekwikaleku Dyambwibwa kampanda dya Ekeleeziya? [Disangisha didi dyamba ne: “Amen.”—Muf.] Eyowa’s, mukalenge. Ncya bushuwa, menemene, dibakula dya Ekeleeziya ne diya nende. Nansha wêwê mwikale Méthodiste, Baptiste, Presbytérien, anyi ne udi nganyi, mwena Mpenta, nekwikale dibakudiibwa bwa kuya.

³¹ Nenku ndi ngeela meeji ne, mu dyakula, mêmè—mêmè ncyêna nteeta anu bwa kujuuka kwimana mwaba ewu bwa kwamba cintu kampanda cîndî ngeela meeji ne ncifwanyine kusankisha bantu to. Kacya ncutuku mwanji kwambula dipiila dya bwalu abu to. Mêmè ndi muswe kujuuka kwimana mwaba ewu bwa kwamba cintu kampanda mu mushindu wûndî ndyumvwa mulombodiibwe bwa kucyamba, cîndî ngeela meeji ne ncifwanyine kwikala dikwacisha kunudi, cintu kampanda

cidi cifwanyine kuyiisha dilabula dyebe ne Nzambi kumpala, pawikala mwena Kilisto; ne pawikala kuyi mwena Kilisto to, cikufikishe ku didyumvwa wêwè mwine bundu, bwa wêwè kulwa mwena Kilisto. Nenku mu kiipacila aku ki mûntù mêmè misangu yônsò nteeta bwa kuteeka meeji aanyi mu mulongo awu, mu mushindu udi Mukalenge mufwanyine kundombola awu.

³² Mpindyewu, tudi badimwijiibwe, bu mudibi ne mu Dilongesha dya Cyôci eci mu matuku a ndekeelu necisekiibwe. Panwikala baswe, twânjàayi anu kubala Cyôci aci, katanci kakese cyanaana. Cidi mu Peetelo Mwibîdi, nshapita mwi3. Twânjàayi kubala anu katanci kakese cyanaana pa cyôci eci. Nshapita mwi3, ku mvensa mwi3 ne mwi4. Tumonaayibi cyôci eci ní kî ncyá bushuwa.

Badyanjile kumanya eci ne, nekulwe baseki mu matuku a ndekeelu, benda bilondeshile nkuka yabo,

Biikale bamba ne: Mulaŷi wa dilwa dyende udi penyi? . . . kacya baataatù beetu baalaala tulu, maalu ônsò mmatungunuke anu muvwawu kacya ku cibangidilu cya bufuki.

Bwa bwalu ebu bôbô badi bapanga kumanya cyôci aci ku bukole ne, nku dîyî dya Nzambi kuwwa maulu a kale, ne buloba bupatuke mu mâyi ne mây-. . . ne mu mâyi.

Ki bwa cinyi buloba bûwàku abu. . . abu, bu mwakabwikidiibwabu ne mâyi, bwakabutuka.

³³ Mpindyewu tudi tumona ne, kabingila kadi kenza ne cyena-bwalu eci badi bacikeeka, mbwalu muprofeta mmwambe mwaba ewu ne mu matuku a ndekeelu aa baseki aba nebalwe bamba byôbi bintu ebi. Nwamonu anyi? Cyakadyanjila kwambiibwa, kabingila kadi kenza ne bantu biikale benza maalu leelu ewu mushindu udibo benza ewu. Mona's, nwênù's nudi bulelela bacîndîle, bwalu Bible ngudi mwambe nanku. "Mu matuku a ndekeelu nebiikale bapape mitu, badibandishi, banangi baa bisankasanka kupita kunanga kwa Nzambi; kabayi bakumbaja mêyi adibo bamba, bashiminyinyanganyi baa maalu, kabayi ne kudikanda, badyombodi baa aba badi bîmpè; biikale ne mmwenekelu wa difwana dya Nzambi, kadi bavila bukole bwadi: kosoloka ne baa nanku awu." Tudi mwa kukeba ditentula dya Bulelela anyi? Cya bushuwa.

³⁴ Paakapweka Môsà mu Ejipitu, bwa kusungila bânà baa Izaleela, mwikale anu ne dikombo mu cyanza cyende bwa dishindika, mwikale ne Nzambi wa mu Dyulu paanyima pende, yêyè wakenza cishima. Kwakalwa batentudi paanyima pende, benza cintu cimwecimwe cyakenzaye aci. Nwamonu anyi? Mpindyewu, bôbô baakalwa biibîdi, paanyima pa yêyè mumane kucyenza wa kumpala. Pashiishe bôbô abu kulwabo, bwalu bavwa bôbô batentula ciwaye mwenze, batentula cya ku muji. Ki citudi tusangana ncyôci aci.

Nenku mpindyewu wêwè udi wamba ne: “Ee, aci’s civwa mmu matuku a Mòsà.”

Kadi Mifundu yimweyimwe ayi’s nyidi yamba ne nebaalukile mu matuku a ndekeelu. “Anu muvwa Yambele ne Yane bakandameene Mòsà amu, ki mwikalabi kabidi bwa bantu aba baa meeji mooneke pa bidi bitangila Bulelela.” Nwamonu anyi? Ditentula, bintu bya mishindu yònsò bwa kulundula bantu. Ne pashiishe piikalabi ne . . .

³⁵ Dyambwibwa diikalà mwa kwenzeka edi, ne cyònsò cidi Nzambi naaci mu njila wa Diyì Dyende aci, kudi misangu yònsò anu cintu kampanda bwa kupatuka bwa kutonkola Cyôci aci bu bôbò mwa kupeta mushindu. Cidi—cidi—cidi nkiipacila kaa Sataana bwa kwenza nanku awu.

³⁶ Bu mudi mwaneetu wa balume ewu, wa ku disangisha dya mu Las Vegas dyadya, uvwa wamba ne: “Sataana wakamba ne buloba buvwa mmwaba wende wa bukookeshi, nenku—nenku mwine awu mwikale ciimamwëndè wa bukalenge cyende pôpò apu.”

Ndi mumanye ne Sataana ki nzambi wa buloba ebu. Ditunga ne ditunga dyònsò mwinshi mwa dyulu emu ndikontononyiibwe kudiye. Menemene. Buloba ebu mbwa Sataana, kadi Yesu ki wângata bukookeshi bwabu. Yêyè wakaMuteekelabu kumpala dîngà dituku. Kadi Yêyè kucibenga, kadi, kwambaYe . . . bwalu Úvwa mumanye ne Yêyè ki uvwa ne cya kulwa Mupyanyi wabu mu matuku acilwalwa.

³⁷ “Baseki.” Twǎnjì tushaalaayi anu katanci pa mwaku umwepele awu, kumpala kwa twètù kuya kule. Baseki!

Mvwa mbala cibejibeji kampanda, kukaadi mbingu mitwe ku yibidi, mu Tucson, mwaba uvwa muntu mulume wa ba-Anglais uvwa ufumina ku Angleterre mwambe diyì kampanda awu. Cidi mu mutu wa bwalu wa mu cibejibeji aci, ne dipoopediibwa dya pa nkuruse dya Mukalenge wetu Yesu Kilisto adi divwa anu difwikakaja cyanaana bwa kushimakajangana, pankaci paa Pilaatu ne Yesu, bwa ne Yêyè wakalwa bwa kwenza . . . anu bwa kuDivwija cintu kampanda. Ne kakwena mushindu wa twètù bafwanyine kubajaadikila ne kî ncyà mafi to, bwalu bidi bikengela bwa bintu byònsò bya Nzambi biitabiibwe ku diitabuuja. Twètù butudi naabu mbwa kuciitabuuja. Mpindyewu, ki kutungunukaye ne kuumvwija mushindu uvwa cyôci aci cifwanyine kwikala cyenjiibwe.

³⁸ Abidi adi panshi aa, mu ditunga dinene adi, Londres, mu Angleterre, eyowa’s we, mwine muvwa John Wesley ne Charles, ne bayiishi banene bàábúngì baa mu matuku a mbangilu abu, Spurgeon ne bakwabo, bayiishile Evanjeeliyo mu bisalu bya bisoosa bya kwelela nyama ne myaba yònsò kwine kuntwaku. Baakadyombola mukenji wa dituku dyabo awu, kadi tangilaayi numone mmwenekelu ukaadibo nende mu dituku edi.

Ki mwaba udi Mwaneetu Williams ne bakwabo abu basanganyiibwa diloolo edi. Ndimwe dya ku matunga adi matambe kwikala mapwekeshiibwe milongo pa buloba. Nkaadi mwendende pa buloba bujima, kadi ncyèna mumanyeku cintu cidi kacyi cyanyishiibwe kudi mikenji bu Angleterre to. Ùdi . . . Billy Graham utu mwambe pende cintu cimwecimwe aci. Mona's, byakakengela bwa kuumushaye mukajende mu lupangu lwa dipicishila kapeepa amu, mushindu uvwa dya—dya—dyangatangana dya balume ne bakaji dyanzeka's, bantu bitangile, mu mpangu ya dipicishila kapeepa mwine amu. Pâmvwà kuntwaku, ncyakamonaku cintu ciwva cifwanyine kucibululula mwoyi wa muntu kupita bivwa byenzeka mu Angleterre amu abi to; yèyè wa bwena wàkapeta mpunga, ne, musangu kampanda, mulombole buloba mu dilongolola awu. Cidi cileeja anu mushindu udiye mwa kudishinda's.

³⁹ Kadi, nudi numona's, cidi cyèza cyôci aci, mukenji wàkapàtukà mwine musangu awu awu, ba-Anglais badi bateeta kwikala balame mukenji umweumwe awu bwa leelu ewu. Awu kawakukumbana leelu ewu to. Kawakukumbanaku to. Mmunyi mudibi bifwanyine . . .

⁴⁰ Ambaayi tũng bu ne Mòsà wakalwa, mufwanyine kulwa, mutwale mukenji wa Noa ne: “Netwibake bwàtù bwa twètù kulelema twenda tupweka ne Nil”? Nunku kî mbikumbane to. Kabidi nansha Mukenji wa Yesu nunku kî mmukumbaneku mu cikondo cya Mòsà to. Nunku nansha mukenji wa Wesley kawakukumbanaku mu cya Luther nansha; anyi wa Luther mu cya Wes- . . . mukenji, wa ewu anyi wa ewu.

Nunku leelu ewu, twètù, dyetu dilongolola dinene dya ndekeelu divwa m'Mpenta. Kadi leelu ewu tudi twenda tuseemena kule ne cyôci aci. Ne mukenji wa beena Mpenta kawakusambakana ne Eci to, bwalu ndituku dikwabo. Cyônsò aci n'Diyi dya Nzambi, kadi diikale dìdìibaka. Anu mudi makàsà, maboko, cyenda cibànda, cidi cyenda cifwimba Mukaji-musela bwa Dyambwibwa. Nwamonu anyi? Kacyena—kacyena cyumusha bantu baa paanyima pààpa baba pa kaaba kaabo to; bôbò abu bavwa ne mwoyi ku wabo mukenji. Bônsò abu neapatuke, bàvwà mu Mukaji-musela abu.

Mbyenze anu mudi mwoyi upicila mu cikolakola cya blé. Ùdi wumuka mu blé, mu cizubu, kadi blé udifwimba mu mmwenekelu wa lutete lwa blé lwàkayà mu buloba alu.

⁴¹ Anu abidi adi panshi aa, mvwa mbala mukanda uvwa mwena Allemagne kampanda mufunde, bwa kudyula. Ùvwa wamba ne: “Ku ba—bakolessi baa maalù bônsò baa pa buloba, ku bônsò abu William Branham kadi's ki watokolu.” Yèyè ne: “Mona's, yèyè kèna cingà cintu to anu . . . Yèyè's mmwena—yèyè's mmwena majimbu. Yèyè's ngudi wenza bintu ebi.” Nwamonu's, muntu awu, kayi mumanye to.

42 Ne, pashiishe, muntu awu uvwa mmudyudi. Kavwa nansha mwitabuuje Nzambi to. Wamba ne: “Nzambi kaayi pende’s uvwa mwa kwikala kacya wàsòmba mu bikondo bya mîdimà byabya, ne maboko mavungila mu difu, useka musùmbà wa beena Kilisto abu; biikale baamaamù, ne bayiidi Bende Yèyè mwine, muvwabo ne cya kwikala’s; baamaamù ne twânà tutekete ne bikwabo, kadi ulekela nyama ya ntambwe yibadya; kayi mwa kujuulaku nansha cyanza to.” Nudi numona kudi meeji a musunya, mwaba udi dilonga dya tulaasa ne bikwabo, kabiyi mwa kuumvwa cikeena-kumona anyi? [Disangisha didi dyamba ne: “Amen.”—Muf.]

43 Bivwa bikengela bwa lutete lwa blé alu kumatalu mu buloba. Anu muvwabi bikengela bwa Yesu kumataye, kujuuka cyakabidi, ki muvwabi kabidi bikengela bwa ekeleeziya wa mpenta kumataye. Bivwa bikengela bwa kuyaye mu buloba, bikondo bya mîdimà abi. Blé yònsò udi. . . Lutete lwònsò lùdi lùya mu buloba elu, bikengela lushaalemu mu cikondo cya mîdimà aci, bwa kuvulanganalù.

Kadi lwakabanga kupatula kabeji mu Martin Luther. Kulwa kupicilalu mu Wesley. Kutungunuka e kubwelalu mu Mpenta. Mpindyewu kubwelalu, bwa kupatukilalu mu lutete. Nenu mpindyewu ndongolwelu ya cyena mangumba yivwabo bashiye paanyima ayi, yikaadi bikolakola, kwajiki. Udi ne cya kwoshiibwa, ndongolwelu mwine wa cyena mangumba awu. Kadi lutete lulelela lwa blé luvwa lupatuke mu dimwe ne dimwe dya ku malongolola awu nelwambwibwe mu Mukaji-musela awu. Yònsò ayi pamwe ki yenza Mukaji-musela.

44 Mpindyewu tudi tusangana ne, mu Angleterre mwamwa, bavwa batentule dipoopediibwa dya pa nkuruse, abidi adi panshi aa, musùmbà wa biine bantu abu, baa baleepa abu. . . bânà baa nsuki mile abu ne bikwabu, benda beela mikunda, babiikila Yesu ne “tonton-yè” ne bintakanyi byònsò abi. Dipota dya kacya!

45 Mpindyewu wèwè udi wamba ne: “Amu’s mmu Londres, mu Angleterre.”

Tangilaayi numone cìvwà mu cibejibeji lumingu lushaale elu, muneemu mu Amerike. Docteur kampanda munene mu bunzambi, wa mu cilongelu cilenga, ùvwa wamba ne di—dipoopediibwa dya pa nkuruse divwa ncintu cifwikakaja bwa kushimakajangana. Kwambaye ne: “Yesu nguvwa muteete anu bwa kuDyenza cyòci aci; ne Yèyè uvwa munwe bisoosa bya katàdyamba mukwacike.”

Kabidi tudi tucisangana mu Genese, mwaba udibo bacyamba. Ncisoosa bu mudi dyamba dya marijuana anyi cintu kampanda. Cidi cisanganyiibwa ku Mubàndù kwaka. Nenu wèwè anu mucinwe, necikulaadike tulu. Pàmwápa . . . Nenu udi

mwenze anu bu ne udi mufwe, mudyŷpwile panshi, ne bikwabo byònsò, munda mwa matuku abidi anyi asatu malondangane.

⁴⁶ Kwambaye ne: “PaakaMupeeshabo mvinyo wa bwanji ne tunyonga twa bululu apu, bidi anu mwa kwenzeka ne byònsò abi biikala bisoosa bya katàdyamba. Nenku paakenzabo aci, paakaMupeeshabo cyôci aci, nenku Yêyê wakadyupwila mu tulu byenze bu ne Ûvwa mufwe. KuMwelabo mu majambu, ne kuMulaadikabo muntwamu. Paanyima paa matuku abidi anyi asatu, cya bushuwa, paakaalukilabo kuntwaku, pa dîbà adi Yêyê’s ukaavwa mubiike cyakabidi, mwikale anu bîmpè.” Yêyê ne: “KuyaYe mu Inde ne kuya kafwilaye mu mwaba kampanda, lufu lwetu anu lûfwafwà bantu bònsò elu, kadi kukeba bwa kufwikakaja ntendeleelu bwa kushimakajangana.”

Dyambedi, mudyudi awu, mbwalu kaayi ebu ne bantu’s? Nwamonu’s, cidi anu ndituku edi ditudi ne mwoyi, baseki, nwamonu’s, dituku bwa kuuja ciprofeta.

⁴⁷ Nzambi mmwabanye Dîyi Dyende mu cikondo ne cikondo cyònsò, nenku bikengela bwa cyònsò cya ku bikondo abi cimweneshe cyôci aci. Ne Yêyê utu kabidi mudyanjile kulongolola bantu kampanda bwa ciine cikondo aci, bwa kuuja Dîyi adi. Musangu wònsò uvwaYe wabanya Dîyi Dyende, Ûvwa ulongolola muntu kampanda bwa wòwù musangu awu. PaakaabanyaYe cikondo cya Mòsà, Wakalongolola Mòsà bwa cyôci aci. PaakaabanyaYe cikondo bwa kulediibwa kwa Mwànà wa Nzambi, WakaMulongolola Yêyê bwa cyôci aci. Cikondo ne cikondo cyònsò, Yêyê utu mulongolole muntu Wende, mudyanjila kulongolola, bu mudi Bible mwambe. Cintu nansha cimwe . . .

⁴⁸ Piikalabi ne Nzambi ngwa kayi mikalu, Wa bukole bwònsò, wa ngulu yònsò, mwikale myaba yònsò, mumanyi wa byònsò, mona’s, Yêyê’s uvwa mumanye bintu byònsò kacya anu ku cibangidilu. Pa nanku, Yêyê uvwa mumanye. Kakwena cintu nansha cimwe mu cincyòmpanyòmpa to. Badi anu ntwètù badi beela meeji ne ki mudici. Ki mudi bintu byònsò byenda nanku. Alujaayi dîsù mu Dîyi Dyende bwa numone cidiYe munkaci mwa dyanza, pa dîbà adi netupete lumvu.

⁴⁹ Mpindyewu, anji elayibi meeji. Dyambedi, bu mwambi awu mwa kwikalaku mwele meeji, paakaMwelabo mvinyo wa bwanji ne tunyonga twa bululu atu mukana apu ne, Yêyê’s wakabitwila. Yêyê kaakabinwaku to, twamb’eku twamb’eku. Nwamonu anyi? Mbaseki bàdì anu munkaci mwa kujuuka’s! Cikwabo cintu, mmunyi muvwa Yesu wa ku Nazaleeta ewu, mmunyi muvwa nsòmbelu Wende mukumbanangane ne ciprofeta cyònsò cya Dipungila Dikulukulu? Bivwa mwa kwenzeka nanku munyi? Kabivwa bwa kwenzekaku to bu ne kabivwa bimana kulongolola kudi Nzambi. Nsòmbelu Wende uvwa mukumbanangane ne ciprofeta cyònsò cya Dipungila Dikulukulu. Cikwabo cintu, piikalabi ne bayiidi abu mbavwa bafwikakaje bwalu Bwende

abu mushindu awu, bwa cinyi muntu ne muntu wa kudibo wakafwa lufu lwa muntu mufwile diitabuuja? Nansha mene mupostolo Peetelo wakamba ne: “Nkudimunaayi nuntume mutu mwinamija panshi. Ncyèna mukumbanyine kufwa mwakafwaye Yèyè to.” Mushindu wakangatabo Andele ne kumukudimunabo mutangile ku luseke pa nkuruse. Bôbò, muntu ne muntu, s’baakatwa citampi ku bujaadiki bwabo ne mashi abo sungasunga. Bôbò bavwa baMwitabuuje ne baMunange, ne baakafila myoyi yabo bwende Yèyè. Piikalabi ne Yèyè uvwa mufwikakaji wa maalu bwa kushimakajangana, mmunyi muvwabo bafwanyine kwikala benze nanku? Nwamonu anyi? Ngangacilu wa mu nyuma, bantu kabeena babyumvwaku to.

⁵⁰ Kuvwa muntu munene kampanda mwaba ewu, abidi adi panshi aa, laabi munene kampanda wâkafûnda ne: “Môsà, pavwabo bapicila mu Mbû Mukunze apu,” yèyè ne, “mu bushuwa bwa bwalu kacivwa mmâyî to. Kabivwaku ne mâyi âkabânda e kwenzawu cimanu to.” Yèyè ne: “Bwalu buvwa ne, kwaka naka ku luseke lukwabo lwa Mbû Mufwe aku, kuvwa cikutukutu cya malenge. Nenku wakapicila mu mâyi a malenge, malenge a mu mâyi. Kamuvwa mâyi muntwamu to. Civwa anu cikutukutu cya malenge, mu mbû wa—wa malenge ki mwakapicilabo.” Ne balombodi bââbûngî baa ntendeleelu batu baciitabuuja, bôbò, ne baciitaba.

⁵¹ Mwaba ewu anu abidi adi panshi aa, pâakabânda mubândi wa mu mabulunga wa kumpala ewu, wakaalukila, ne kavwa mukamonemu cintu nansha cimwe cya Nzambi to. Aci kadi kunyungululaci too ne mitu ya bambi. Bôbò bavwa badyelela meeji ne Nzambi uvwa musômbèle mu mwaba kampanda muulu amu, mu butumbuke bwa miles lukama ne makumi ataanu [kilomeeta 240].

⁵² Mona’s, ekelekele, mushindu mwine udi dilonga dya tulaasa ne lungenyi lwa pa buloba ebu bikudimune ekeleeziya bimuvwije cikutukutu cya bisoosa bibi’s we! Kudi...Dilonga dyabo dya tulaasa ne ndongolwelu wa bulongeshanganyi, maalu a mamanya ne dishidimuka, s’mbya dyabulu. Ndishidimuka dya dyabulu. Ki mudi Bible mwambe nanku.

Kadi dyetu Dishidimuka dilwalwâ kadyakwikalaku ne kantu nansha kamwe kaa dipetangana ne edi dishidimuka to, nansha kakese. Kadyena ne kantu nansha kamwe kaa dyôdi edi to, nansha kakese. Nekwikale Dishidimuka dishiilangane, dishiilangane ne dishidimuka edi ne bya maalu a mamanya bitudi naabi ebi. Patudi tutamba kubwela mu maalu a mamanya, tutamba kulwa beena maalu a mamanya, tudi tutamba kuya kule tukabwela mu bintu bya lufu, mateyi bwa kushipangana, ne bikwabo byônsò. Mu Dishidimuka dipyadiya adi, kamwakwikalaku nî ndufu, nî mmabeedi, nî ntunyinganyinga, anyi nî mmikenyi ya mâsaamà to. Nwamonu

anyi? Kabyakwikalamu nansha cimwe Mwômò amu to. Nenku edi dishidimuka nebikengele kudibutula, bwalu ndya dyabulu.

⁵³ Tudi tusangana ne, mu Genese 4, beena Kaayina mbavwa babange dishidimuka, biibaka bimenga ne nsesa, ne bikwabo, ne byombelu bya mijiki, ne baakalwa beena maalu a mamanya. Ki bantu kuyabo kule menemene ne Nzambi, cibì batendeleedi. Kadi paakalwa beena Seta, paakabangabo bôbò kulwa, baakasoka Dìnà dya Mukalenge.

Kaa, nwênù bàdì bamba bwa mudimuke's!

⁵⁴ Ncyêna mwaba ewu bwa kutapa muntu ku mwoyi to, pândi ngamba cintu bwa ekeleeziya kampanda. Nenku pawikala kaaba aka, mwikale mwena ekeleeziya ewu, ncyêna ngamba cyôcì eci bwa kukutapa ku mwoyi to; bwalu kudi bantu bîmpè bààbûngì mwômò amu, anu mudibo mu ekeleeziya mikwabo. Kadi mwwa mbala mu Shreveport lumingu lushaale elu, mwaba udi ekeleeziya wa Katolike mwambe dîyì kampanda.

Kadi tudi tumona mwaba udibo balwa kудisanga bônsò mpindyewu mu nsangilu munene wa bukwärtsendeleelu, ne bikwabo byônsò, biikale buuja anu menemene cidi Bible mwambe ne nebênzè aci. Anu menemene's!

⁵⁵ Mpindyewu tudi tusangana ne bôbò mbambe ne: “Mona's, Bible...” Bamwe baa ku beena Mishònyì mbaswe kwikala bakwate ku Bible awu. “Mona's,” mudibo bambe, “Bible's uvwa anu mukanda wetu ewu, bwalu bulonda bwa ekeleeziya, ne kabavwa nende mu difunda dya mikanda to kukaadi bidimu nkama yibidi ne makumi ataanu. Civwàku misangu yônsò civwa anu ekeleeziya.” Bôbò ne: “Ekeleeziya nguvwaku, kî m'Bible to, ne Bible udi anu bwalu bulonda bwa bidi ekeleeziya mwenze.” Mashimi kaayipu a budimu's we! Mona's, s'tudi ne Bible kukaadi bidimu binunu bisatu. Dipungila Dikulukulu's dikaavwa difundiibwe mu Mifundu, munda mwa nkama ne nkama ya bidimu kumpala kwa dilwa dya Kilisto. S'cidi anu cintu cya budimu cya dyabulu!

⁵⁶ Kadi nyawu tusangana mu dituku edi, mùdì diseka dinene ne dyelulwila dya Bible edi, ne biikale bateeta bwa kuMusaka pambelu, bikengela bwa Nzambi alumbulwishile ekeleeziya ku cintu kampanda. Yêyè kêna mwa kwikala mululame. . .

Kabeenaku mwa kupweka mu mùsèèsù emu bwa kunkwata, ne kwamba ne ndi nyeemesha mashinyi lubilu lwa miles makumi asatu [kilomeeta 48] ku dîbà mu mwaba udi ukengela kunyeemesha lubilu lwa miles makumi abidi [kilomeeta 32] to, amba anu kwikàle cintu kampanda mwaba awu bwa kungambila ne ndi ne dyanyisha dya kunyeemesha anu lubilu lwa miles makumi abidi. Bikengela ciikaleku.

Kadi Nzambi neikale mwa kulumbulwisha ekeleeziya, nealumbulwishe bantu, dîngà dituku. Aci kaayi tudi bamanye. Kudi Cilumbulwidi ciikalà mwa kulwa. Pa nanku

piikalaYe mwa kumulumbulwishila ku ekeleeziya wa Katolike, ng'ekeleeziya kaayi wa Katolike awu? PiikalaYe mwa kumulumbulwishila ku wa ba-Méthodistes, ba-Baptistes's mbajimine. Yêyè mumulumbulwishile ku ba-Unitaires, ba-Binitaires's mbajimine. Nwamonu anyi? Yêyè neikale mwa kumulumbulwishila ku cinyi? Yêyè mmwambe ne Neikale mwa kumulumbulwishila ku Kilisto, ne Kilisto udi Dîyî. Nunku nku Dîyî dya Nzambi, ki kwalumbulwishila Nzambi. "Ku cibangidilu kwakadi Dîyî, ne Dîyî dyakadi ne Nzambi, ne Dîyî dyakadi Nzambi. Ne Dîyî dyakavwijibwa mubidi ne dyâkasombela munkaci mwetu. Umwèumwè awu makeelela, leelu, too ne kashidi." Nwamonu anyi? Pa nanku, Yêyè neamulumbulwishile ku Dîyî Dyende.

⁵⁷ Nunku mpindyewu tudi tusangana mu dituku edi ne, padibo bateeta bwa kusakila Bible pambelu apu ("Itabaayi ekeleeziya!") Bible awu: kî mbaMusweku to. "Ekeleeziya!" anu bwa baamonaku paakukwatakajilabo mushindu kana wônsò wa twitabaayi anyi cintu cikwabo kana cyônsò, kadi kwikalabo bendela ku cyôci.

⁵⁸ Ee, bu mûmwà ngaakula diloolo dikwabo mu Shreveport. Mu mee—meesa a Mukalenge, padibo bashipa mwânà wa mukooko wa mulambu awu, kabivwa bikengela bwa kwikalaku "lwevenya nansha lukese munkaci mwabo to, mu matuku ônsò mwandamutekete awu," kakuyi lwevenya, kakuyi mâmpà meela lwevenya to. Bivwa bikengela bwa cintu cyônsò kwikalaci kacyi ne lwevenya to. Aci civwa cileeja bikondo mwandamutekete bya ekeleeziya bitudi naabi mu mukanda mwaba ewu ebi, nunku kakwena lwevenya to. Cinyi? Ncintu kampanda cidi cisambakajaKu. Nunku tudi tusambakaja twitabaayi ne dingumba, ne bikwabo byônsò, ne Dîyî, kadi kutungunuka anu ne kuteeta kucibiikila ne n'Dîyî. "Kamwikadi ne lwevenya nansha lukese to, biikale nanku mu matuku ônsò mwandamutekete awu."

⁵⁹ Nansha cidi cidiibwa leelu ewu eci, kanuteeci kucilama bwa maalaba to. "Nücyôshè mu mudilu, kumpala kwa dîbà kupatukadi," bwalu kulwalwa Mukenji mupyamupya, ne cintu cipyacipya. Nwamonu's, bateeta kucilama, kadi aci's ki lwidi ludi naalu ekeleeziya. Ditabuluja dipatuka, katanci aka, mu bidimu bitwe ku bisatu, babanga bulongolodi kampanda busakidila ku dyôdi. Dingumba didi anu dibanga anyi, bulongolodi.

Kadi nukaadiku bamone anyi? Eci cyôci cikaadi cipaasalale eku ne eku munda mwa bidimu makumi abidi patudi twakulangana apa, kadi kakuyi bulongolodi nansha bumwe to. Ne bwôbò bwine kabwadyakwikalaku to. Eci ndekeelu. Blé ukaadi mwalukile cyakabidi ku blé. Blé ukaadi mwalukile ku lutete lwende. Cizubu cikaadi cidikoke cyumukeku. Nunku

blé udi ne cya kushaala mu Bwikadi bwa Mwânà, bwa kubobeshiibwaye.

⁶⁰ Kî ncintu cya pabwaci anyi, padibi ne, abidi adi panshi aa, ku Côte Est eku, nkwenzeke difiikishiibwa dinene dya fitutu? Kabavwaku bafwanyine kucyumvwa to. Texas mufiikisha fitutuu, lumingu lushaale elu. Kabeena mwa kucyumvwa to. Kanwenaayiku nufika ku dyumvwa ne cyôci aci ncimanyinu anyi? Kanwenaayiku bamanye ne matunga adi munkaci mwa kukosoloka anyi? Izaleela ukaadi mu buloba bwende. Ne bimanyinu ebi bidi bileeja ne tukaadi ku nshiikidilu. Cikondo cimwecimwe aci kùdi difiikishiibwa dya fitutu, kanwenaayiku numanya ne ki cimanyinu cyakamba muprofeta aci anyi? Eyowa's. "Kadi nekwikale Bukênkè lwà pa ib'a muloolo," bwa ne nekulwe Bukênkè kampanda mu cikondo cya diloolo, piikala difiikishiibwa dya fitutu ne bikwabo mwa kwikala byenzeka mudibi byenzeka mpindyewu emu.

⁶¹ Tangilaayi anu numone mùdiku difiikishiibwa fya fitutu. Paapà's wáfumu ku difika muneemu emu.

Vulukaayi ne, ku tabernacle, pavwabo. . . Nudi ne mikaba ya mèyi ayi. Ngeela meeji ne, nwênù bônsò nutu nuyangata. Mushindu uvwa Mukalenge muleeje kwôkò aku dituku adi, mu tabernacle amu, anu menemene myaba yivwa bikondo bya ekeleeziya abi mwa kusanganyibwa ne mushindu uvwabi mwa kwikala! Nkaavwa mêmè mumane kubizola ku cibasa aku, bikondo bya ekeleeziya binudi numona bizola apa mu mukanda ebi. Nenku bu ne Nyuma Mwîmpè awu kavwa mutuuluke mu Dikunji dya Kapyra dinene, ne muye buludi paanyima pààpa ku cimanu kwaka mubizole to, Yèyè mwine, pàvwà bantu nkama yisatu anyi yinaayi basòmbe, biikale baDitangile!

Nenku paapà mmwenze anu wasa lwendu bwa kuvwila muneemu, ki ngondo umba ufiikishiibwa fitutuu mu mushindu kampanda. Kî kukwatabo maafôtò abo mushindu anu umweumwe uvwabi bizodiibwe pa cibumba cya ku cyambilu awu. Nenku yèyè mmwenze lwendu lwende lwa upicila muneemu alu mu matuku a ngondo dikumi ne asatu, mwendele pa bibandilu dikumi ne bisatu, mufile koomunyo kudi bantu dikumi ne basatu, kudi ditunga dyena nomba mwikale dikumi ne yisatu, ne difiikishiibwa dya fitutu diikale dyenzeka myaba yônsò. Kanwenaayi numona mwaba utukaadi anyi? Tukaadi ku cikondo cya nshiikidilu.

⁶² "Baseki nebajuuke mu dituku dya ndekeelu, bamba ne: 'Kakwena dishiilangana pankaci paa cikondo civwaku aci, ne cyakalaala baataatù beetu tulu aci to.'"

Kadi panudi numona bintu ebi bibanga kwenzeka, bandulukaayi, nudilongolole. Cintu kampanda ncifwanyine kwenzeka pa dîbà kana dyônsò, Kilisto uvwila Ekeleeziya Wende.

63 Mpindyewu, bôbò kabeena baciitabuujja to, bwalu cidi. . . cidi. . . Bôbò, badi ne cya kwi-. . . Kabeena bafika ku dyumvwa ne bôbò mene ki badi buujja Mifundu ayi to. Bulelela budi ne bantu kabeena bafika ku dyumvwa ne, mu kwenza kw bintu ebi ne mu kwamba kwa bintu ebi, badi munkaci mwa kuuja Mifundu to.

Mushindu mwine uvwa Kaayifa, mwakwidi munene, ne baakwidi bônsò abu mu diine dituku adi, bàvwà baseka bàMwelulwila abu, kabàyi batambe kumanya ciine aci, Nzambi mwine uvwabo bimba awu ne: “Nzambi wanyi, Wèwè wâNdekèdi bwa cinyi?” Musambu wa 22: “Mbatubule byanza Byanyi ne makàsà Aanyi.” Bôbò munkaci mwa dimba ciine aci mu ntempelu, Yèyè pende munkaci mwa kufwa pambelu pàapa ku nkuruse. Kabàvwa bamanye ne bôbò mbavwa munkaci mwa dicyenza to. Nansha Yesu mwine wakasambila ne: “Taatu, ubafwile luse. Kî mbamanye cidibo benza to.” Bwalu, mu bushuwa bwa bwalu bôbò mbakaavwabo badyanjile kwamba, kudi Mifundu ayi ne, nebiikale bampfo.

64 Nutuku bamanye ne ekeleeziya wa Mishònyì ne wa Katolike ne bôbò mbakaadibo badyanjile kwamba ne, mu matuku a ndekeelu, nebiikale bampfo, cintu cimwecimwe aci, pa bidi bitangila Mifundu, ne Kilisto mwikale pambelu, uteeta bwa kubwela anyi? “Bwalu wèwè udi wamba ne: ‘Ndi mubanyi, ne ncyèna nkengela cintu,’ kuyi mumanye ne udi mwena dikenga, mupele, mukengeledi wa luse, butaka, ne mpofo, kadi kuyi mucimanye to,” Bwakabuulwibwa 3. Ki bwalu mbwabu’s, baalukile cyakabidi ku bufofo, badyatakaja ku makàsà bintu bya Nzambi, byenze bu ne (byôbi) Cyôci aci kacivwa ne civwaci cibambila to, baseka baCyelulwila. Aci ncidi Bible mwambe.

65 Kadi bwa Ekeleeziya, Mukaji-musela, Dyambwibwa ndibuulula bwende Yèyè. N’Dimubuulwila Yèyè. Bwa ne, dibuulula adi, Mukaji-musela mulelela wa Kilisto ki wíkala mwindile dyôdi dibuulula dya Dyambwibwa adi.

66 Mpindyewu, ndibuulula, bwalu’s dibuulula ndiitabuujja. Kwèna mwa kupeta dibuulula piikaladi kadiyi diitabuujja to. Diitabuujja ndibuulula, bwalu ncintu kampanda cidibo bakubuulwile wèwè. Diitabuujja ndibuulula. Diitabuujja ncintu kampanda cidibo bakubuulwile wèwè, bu mwakadibi bwa Abraham, yèyè uvwa mwa kubiikila cyônsò civwa cibengangana ne cikaavwabo bamubuulwile yèyè aci, byenze bu ne kacivwa nanku to. Mpindyewu, diitabuujja, ki cidi diitabuujja ncyôci aci, ndibuulula dya Nzambi. Ekeleeziya mmwibakila pa dibuulula kampanda, Mubidi wônsò mu kaabujima awu.

67 Muneemu emu kukaadi ndambu wa mbingu, mvwa ngaakula ne mwambi kampanda wa ba-Baptistes wa maalu mimpè be. Uvwa mulwe bwa kuyiikilangana naanyi. Kwambaye ne: “Ntu

mukunange wêwè bu muntu, kadi,” yêyè ne, “udi mu cibwejakaji cya kacya.”

Mémè ne: “Nanku, ndi ndomba bwa undongololeku,” (yêyè ne. . .) “ne Mifundu.”

Yêyè ne: “Katwakukumbanaku to, Mwaneetu Branham, bwa kutwangaja bintu abi to anu twêtù bateeke Mwaku wònsò pa Mwaku, pa Mwaku, menemene anu ne cyena Ngelika, ne bikwabo.”

⁶⁸ Mémè ne: “Kaa, mukalenge, wêwè’s udi mumanye bipite apu.” Mémè ne: “Nansha mu Nsangilu wa Nicée mwine, patudi mwa kwalukila paanyima menemene pààpa, bidimu nkama yisatu kuumukila ku lufu lwa Kilisto, bacivwa anu bakokangana bwa kumanya ne mmumanyi wa dibàlà kaayi wa beena Ngelika uvwa mu bulelela. Wêwè’s udi mwa kumanya. S’ndibuulula, cintu cyònsò mu kaabujima. Ncibuulul- . . .”

Yêyè ne: “Mémè ncyèna mwa kwitabaku dibuulula to.”

Mémè ne: “Pa dibà adi udi mwa kwitaba Kilisto bishi?”

Yêyè ne: “Mona’s, Bible’s mmwambe ne: ‘Ewu udi witabuuja udi. . . Yesu Kilisto, udi ne Mwoyi wa kashidi.’”

⁶⁹ Mémè ne: “Aci’s ncyà bushuwa. Mmwambe kabidi ne muntu nansha umwe kêna mwa kubiikila Yesu ne n’Kilisto to anu ku dibuulula dya Nyuma Mwîmpè udi mumubuulwileci.” Nwamonu anyi? Ki bwalu mbwabu’s, munyunguluke kadi kwalukila cyakabidi buludi, mwalukile mukapone cyakabidi ku dibuulula’s. Bikengela ciikàle cibuuludiibwe, mu Bible.

⁷⁰ Kaayina ne Abele kabavwa ne Bible wa dibalabo to, kadi baakacibuulwila Abele, ku diitabuuja, didi diikale dibuulula. Abele wakalambula Nzambi mulambu mwîmpè kutamba wa Kaayina. Ku cyòci aci, Nzambi wakafila bujaadiki ne yêyè uvwa mwakane.

Paakakonkabo Yesu mwaba ewu, Maataayi 16.17 ne 18. Katwena ne dibà dya kucibala to, kadi panwikala baswe kucifunda’s. Wakamba ne: “Bantu badi bamba ne Mémè Mwànà wa muntu Ndi nganyi?”

“Umwe wa kudibo mmwambe ne Wêwè udi ‘Mòsà, Eliya, anyi bikwabo.’”

Yêyè ne: “Kadi nwênù nudi nwamba ne Ndi Nganyi?”

⁷¹ Yêyè ne: “Wêwè udi Kilisto, Mwànà wa Nzambi udi ne mwoyi.”

⁷² Yêyè ne: “Udi mubeneshiibwe, Simona, mwànà wa Yona, bwalu kî mmubidi ne mashi bidi bikubuulwile cyòci eci to. Taatù Wanyi udi mu Dyulu ngudi mukubuulwile Cyòci eci. Pa lubwebwe elu,” dibuulula dya nyuma dya ne Nzambi udi Nganyi, Yesu udi Nganyi. Ne Yêyè udi dibuuludiibwa dya Nzambi, Nzambi muvwijiibwe mubidi ne mubuulwila baa pa buloba.

“Yèyè uvwa pa buloba. Nzambi uvwa munda mwa Kilisto, mwikale upungisha baa pa buloba ne Yèyè mwine, ubuulula civwa Nzambi, mu mubidi wa musunya.”

“Udi Kilisto, Mwela maanyi awu, Mwânà wa Nzambi.”

⁷³ Yèyè ne: “Kî mmubidi ne mashi bidi bikubuulwile cyôci eci to, kadi Taatù Wanyi udi mu Dyulu ngudi mukubuulwile cyôci eci. Pa lubwebwe elu Nèngiibakilèpu Ekekeleeziya Wanyi, dibuuludiihwa dya Dîyî mu muvù waDi. Nèngiibakè Ekekeleeziya Wanyi, ne biibi bya iferno kabyena mwa kuMutamba bukole to.”

⁷⁴ Mukanda wa Bwakabuulwibwa ki Mukanda wa ndekeelu wa Bible. Mmutwa citampi bwa beena bupidya. Mwômò amu, Bible udi wamba, mu nshapita wa 22 ne: “Ewu yônsò wîkala mwa kuumushilaKu Dîyî dimwe, anyi kusakidilaKu dîyî dimwe, Nèngûumushè cyende citupa ku Mukanda wa Mwoyi.” Tudi tufika ku dyumvwa, pa dîbà adi ne, cyônsò cijima civwa cifidiibwe bwa beena kwitabuuja. Ne Cidi cikangula Mukanda wa Bwakabuulwibwa ne cibuuulula ne Mwena Mukanda ewu mu kaabujima udi Nganyi. “Bidi bikengela kuMutangila bu Alpha ne Omega,” kuumukila anu ku Genese too ne ku Bwakabuulwibwa, Yesu Kilisto anu umwèumwè awu, ku ntwadijilu too ne ku ndekeelu. Ne cibuuulula bwalu busokoka Bwende bwônsò nkòong bwa Yèyè mwine, ne bwa mpàngù Yende bwa bikondo Byende bya ekekeleeziya bilwalwà, ne bivwà bitwibwemu citampi ne Bitampi Mwandamutekete.

⁷⁵ Mpindyewu, Mukanda wakafundiibwa, kadi pa dîbà adi, nwavulukaayi ne, Wôwò uvwa mukanga ne Bitampi Mwandamutekete. Ne byôbî Bitampi Mwandamutekete ebi kabivwa ne cya kukangudiibwa to (Bwakabuulwibwa 10) anu too ne ku dyela dya mpungi dya mwanjelo wa pa buloba wa ndekeelu pa buloba, Bwakabuulwibwa 10.7. Nwamonu anyi? “Ne mu matuku a dyela dya mpungi wa Mukenji wa mwanjelo wa ndekeelu, mwanjelo wa mwanamutekete, bwalu busokoka bwa Nzambi budi ne cya kujika mu cikondo aci.” Aci, nenku ki cyôci cikondo citudi ne mwoyi eci.

⁷⁶ Twêtù bônsò tudi bamanye ne tudi ne mwoyi mu Cikondo cya Laodikiya. Kakwakwikalaku cikwabo cikondo cisakidila ku eci to. Kacyena mwa kwikalaku to. Pa nanku, tudi ne mwoyi mu Cikondo cya Laodikiya. Ne Bitampi Mwandamutekete bivwà bilame Mukanda awu ebi, mbwalu busokoka bantu, bivwa ne cya kukangudiibwa mu diine dituku adi. Cyôci aci ki cyakalayaYe. Mpindyewu, kacyakwikala cintu kampanda nansha cimwe pambelu paa Dîyî nansha, bwalu kwèna mwa kusakidila ku Dîyî anyi kuumushila ku Dîyî to. Bidi bikengela bwa kushaalaci misangu yônsò anu Dîyî. Kadi bidi bikengela bwa dibuulula kubuululadi Bulelela bwaDi, cîdi Dyôdi adi, bwa kuDivwija dikumbanangane ne mikwabo Mifundu. Nenku pa dîbà adi Nzambi udi ushindika aci ne ki Bulelela. Nwamonu anyi?

⁷⁷ Nzambi kâna dijinga ne muumvwiji nansha umwe to. Yêyè udi Mudyumvwijidi wa Yêyè mwine. Yêyè udi uDyenzela Yêyè mwine dyumvwija pa kwenza ne maalu adiYe mwambe enzeke. Bu muvwabi ne, ku cibangidilu, Yêyè wakamba ne: “Bukênkè bwikaleku,” ne bukênkè bwakiikalaku. Aci kacyna cikengela dyumvwija kampanda nansha. Cyakashindikiibwa.

⁷⁸ Mpindyewu, Yêyè wakalaya bintu kampanda mu dituku dya ndekeelu edi, mu Mifundu. Mona’s, s’ki byôbi abi.

Mushindu awu ki uvwa Yesu mwikale Mwânà wa Nzambi. Yêyè ngwâkalaya bwa kuMutuma. PavwaYe mu matuku Ende panu pa buloba, ne bantu kabayi mwa kuMwitabuujja to, Yêyè wakamba ne: “Kenketaayi Mifundu, bwalu mu Yôyi ayi ki munudi nwela meeji ne nudi ne Mwoyi wa Cyendeleele, kadi paabi Yôyi ayi ki yidi yimfidila Mêmè bujaadiki. Piikalabi ne Ncyêna ngenza byenzedi bya Taatù Wanyi to, pa dîbà adi kanuNgiitabuujji to. Kadi panwikala kanuyi mwa kungiitabuujja Mêmè, itabuujjaayi byenzedi bîNdi ngenza abi, bwalu byôbi mbidi bifila bujaadiki bwa ne Mêmè ndi Nganyi.”

⁷⁹ Ee, pa dîbà adi, mu cikondo cya Wesley, byenzedi byakenzaye’s ki bivwa bifila bujaadiki bwa ne yêyè uvwa nganyi.

Mu cikondo cya Luther, cya dilongolola, mona’s, cya bushuwa, s’cyakafila bujaadiki bwa ne yêyè uvwa nganyi.

⁸⁰ Mu matuku a beena Mpenta, dyalujulula dya mapà, dyalujulula dya mapà, dyakula dya mu myakulu ne diipata dya badémmons, ne mapà, mona’s, cyôci aci’s ncyakafila bujaadiki. Kakuvwa dyela dya bilele pa bwalu abu nansha. Bantu bavwa bamba, dîbà dyakajuukabi bwa musangu wa kumpala. . . Ntu mubale mikanda pa maalu malonda a Mpenta. Baakamba ne: “Kacyakunengaku to. Necijime.” Cîcîdî anu citeema’s. Bwa cinyi? Bwalu kanwadyakucijimaku to. Nzambi ngwâkamba ne neciikaleku. Ncitupa aci cya Dîyi, nenku kwêna mwa kucijimaku to.

Nenku pa dîbà adi padi Mukaji-musela munkaci mwa kubiikidiibwa bwa kupatuka, neucijime munyi? Ndibuulula dya dimweneshiibwa dya Dîyi dîvwijiibwe dilelela. Ne twêtù tudi ne mwoyi mu diine dituku adi; butumbi bwikale kudi Nzambi; dibuulula dya bwalu busokoka bwa Yêyè mwine.

⁸¹ Mpindyewu, Dyambwibwa didi anu. . . Dyambwibwa diine ditudi twamba edi, didi anu bwa Mukaji-musela nkaayende. Vulukaayi ne, Bible mmwambe ne: “Ne bamwe baa ku bafwe kabaakiikala ne mwoyi to munda mwa bidimu cinunu.” Dyambwibwa dinene edi! Piikalabi ne kakwenaku Dyambwibwa kampanda to, balunda baanyi, tudi penyi? Citwenza ncinganyi? Mmu cikondo kaayi mutudi ne mwoyi emu? Mulayi utudi twêtù naawu mmulayi kaayi? Nekwikaleku Dyambwibwa kampanda. Bible udi wamba ne nediiikaleku. Ne nediiikale anu bwa Basungula nkaayaabo, Inâbânzâ Musungula

awu, Mukaji-musela mu dituku edi, udi mukokiibwe mupatula, Ekeleeziya.

⁸² Mwak-...mwaku mwine, *ekeleeziya*, udi wumvwija ne “mubiikidiibwe pambelu pa.” Anu mwakabiikila Mòsà cisamba pambelu paa cisamba amu, Nyuma Mwimpè udi munkaci mwa kubiikila Mukaji-musela pambelu paa ekeleeziya; Ekeleeziya pambelu paa ekeleeziya; bidimba, bifumina mu dingumba ne dingumba dyònsò, biikale byenza Mukaji-musela, mucu-Mukaji-musela. Cidi mu—mu mukaba wa mèyì wa ne, *Muci-Mukaji-Musela*. Mukaji-musela kampanda wenda upatuka, dibiikila, ne yèyè awu ki udi. . . mucu-Mukaji-musela ngudi, Mukaji-musela’s we, ki wíkala mu Dyambwibwa; awu, nkaayende, kayi cingà cintu to anu Mukaji-musela, basungula badyanjila kumanya kudi Nzambi kacya ku cibangidilu, mitoloku ya mu nyuma ya Taatù.

Lekelaayi ngänjì kwimanaku mwaba ewu katanci kakese. Kadi ndi anu ntungunuka ne kuumvwa mutu unnyunguluka, pa kwela meeji ne nënnùlamè, nnulama ntanta mupitepite bule.

⁸³ Kadi, monaayi, tangilaayi, muntu ne muntu wa kunudi aku. Nutuku bamanye ne, bidimu kumpala kwa wèwè kulediibwa, uvwa munda mwa tatwèbè bu mutoloku anyi? [Disangisha didi dyamba ne: “Amen.”—Muf.] Ncya bushuwa. Civuba, dimiinu, divwa munda mwa tatwèbè; difumine ku mubidi wa bulume, kî nku mubidi wa bukaji to. Nwamonu anyi? Mubidi wa bukaji udi utwala diyi, budimi bwa dyela mamiinu. Kadi civuba cidi cifumina kudi taat-...Mpindyewu, twámbe ne, munda mwa tatwányi mêmè. . .

⁸⁴ Anyi, mwanaanyi wa balume udi musòmbe apa ewu, pâncivwà ne bidimu dikumi ne bisambombo, mwanaanyi wa balume ewu uvwa munda mwanyi. Ncivwa mumumanye to, kadi ùvwamù. Mpindyewu, kupicila ku budimi bwa dyela mamiinu, kupicila ku nsòmbelu wa cijila wa bantu baselangane, ùlwa mu cimfwanyi cyanyi. Nkaadi mumumanye. Ndi mwa kubwela nende mu bwobumwe. Nenu mmufike anu pa dîbà mene divwabi ne ki dîbà menemene adi.

⁸⁵ Mpindyewu, ki muvwabi kabidi bwebe wèwè, pawikala ne Mwoyi wa Cyendelele, uvwa. . . munda mwa Nzambi kumpala mene kwa kwikalaku dyulu ne buloba. Wèwè udi citupa, mwànà wa balume wa Nzambi, cyambiibwa cya Nzambi. Yèyè uvwa mumanye cikondo mene cyûvwà mwa kulwa. KudyanjilaYe kukulongolola bwa cyôci cikondo aci, bwa wèwè kwangata kaaba aku, ne muntu mukwabo nansha umwe kèna mwa kukangataku to; nansha kwikale ditentula ne bikwabo bintu bûngi munyi. Bidi bikengela anu wèwè wikale mwaba awu, bwalu Yèyè ukaavwa mumanye ne wèwè ki wíkalapù. Mpindyewu udi mumweneshiibwe. Mpindyewu udi mwa kubwela Nende mu bwobumwe, ne ciine aci ki cidiYe

muswe. Yèyè udi ujinga bwobumwe, bwa kukuukudiibwa. Kadi piikalabi ne mwoyi webe kawuvwa... misangu yònsò kawuyi anu cyambiibwa munda mwa Nzambi to, udi wèwè anu mutentudi wa bwena Kilisto cyanaana. Nwamonu anyi? Nekwikale baa nanku miliyò ne binunu bya miliyò, bôbò nebiikale anu batentudi baa bwena Kilisto.

⁸⁶ Dìyì dîmwà mwambe anu abidi adi panshi aa. Mwua ntangila Mwaneetu Demos Shakarian udi pààpa wawa, pavwabo benza disopakaja dya mamiinu a ngombe, ntangila tulangi twa disangishila bivuba ne mayi, ne bikwabo, pavwabo babyangata kudi bangangabuka baa nyama, ne ntangila biine bintu ebi.

⁸⁷ Mu dipatula dya cya bushuwa dya bivuba bya nyama mulume, mudi bivuba bitwe ku mùliyò mujima bidi bipàtukà kudi mulume awu ku musangu wònsò. Ne mayi matwe ku mùliyò mujima àdì àfùminà kudi mukaji ku—ku musangu umweumwe awu. Kadi nukaadiku bamanye ne, mu tuubivuba twònsò tukese tùdì twatwa eku twatwa eku atu, mùliyò mujima watu awu, kudi anu kamwepele kaa ku twòtò atu kadi kalongolwela mwoyi, ne kudi diyi anu dimwepele dìdì dya bufukà anyi? Nenku kaacivuba kakese aku nekadikoke kenda kàbànda kagicila mu tuubivuba tukwabo twònsò tukese atu, kagicila buludi kumutu kwa kaacivuba ne kaacivuba kakese kònsò kàdì kafwanangane anu naaku menemene aku, ne kagicila kumutu kwa kàka ne kagicila kumutu *eku*, nenku kalwa kusangana diyi dìdì dya bufukà adi kadi kudikoka e kubwelamu. Ne pashiishe bikwabo byònsò bìdì bishààla abi bidi bifwa. Mona's, nwènù bàdì bààkulà bwa dilediibwa dya kudi virgo, kaa, kadyena nansha cyabibidi cimwe cya bwalu busokoka bwa dilediibwa dyetu dya mu mubidi edi to, mushindu udidi didyanjila kuteeka, didyanjila kulongolola kudi Nzambi!

⁸⁸ Mpindyewu, ku cibangidilu, kale wawa, kale kukaadi bidimu ne bidimu kumpala kwa bikondo kubangabi, wèwè, pawikala mwena Kilisto mulediibwe cyakabidi, diloolo edi, uvwa munda mwa Nzambi piine apu, Tawèbè. Ki bwa cinyi, pawakalwa mu mwoyi wa panwapa ewu ne ujikula mùvwà mwena Kilisto, ee, maalu ònsò enda anu luboko, ukaadi mudikonkekonke ne mbwa cinyi bidi *nunku*, ne byònsò *ebi*. Cyòci aci, ukaadi mudyèlèlè nkonko pa bwalu abu. Kadi, dîngà dituku, Cintu kampana e kukulengaci. Civwa ncinyi ciine Aci? Mwoyi uvwa munda amu awu, kacya ku cibangidilu. Nenku piikalaci . . .

⁸⁹ Byenze bu kaamuyiiki kaanyi kaa mukanku aku, ùmupeta, mamwākù upeta mukanku awu. Nukaadi bangumvwe nyiisha pa cyòci aci, mùvwà kànà kaa mukanku aku bakatooyishile mu cyàdì cya nzoolo wa cikuka. Kadi nzoolo awu, byende biibidilu bya kuteeta kudiisha twànà twa nzoolo atu—atu, kànà kaa mukanku aku kakavwaku mwa kubidya kabiyi bikasaamisha to, bwalu kakavwa kazoolo to, kwine kwònsò aku. Kadi, kavwa

kasanganyibwa mu lupangu lwa nzoolo amu pamwe ne twânà twa nzoolo atu, kenda kalonda cikuka aci. Kadi cikuka aci civwa mwa kwenda kukala mu lupangu lwa nzoolo amu ne bikwabo, kadi kaamukanku aku kakayiku mwa kubitwala to. Kadi dîbà dyônsò divwa cikuka aci anu mwa kutuuta cyokò-cyokò ne bikwabo adi, ne twânà twa nzoolo twônsò atu tuyaku, ne kôkò kàyakù paaku. Kadi dîngà dituku . . .

⁹⁰ Mamwākù uvwa mumanye ne uvwa mwele mayi abidi, kî ndimwepele to. Kuvwa ne cya kwikala dikwabo, mwaba kampanda. Kuyaye wenda ukebangana naadi, wenda upaapala eku ne eku, unyunguluka. Ndekeelu wa byônsò kuya kafikaye too ne kuulu kwa lupangu lwa nzoolo alu, ne kusanganaye kânà kende aku, ne kukeelaye lubila lukole. Civwa ndîyî, mu mushindu wa ne, kôkò aku kufikaku ku dyumvwa ne ki cintu ncyôci aci civwa cikumbanangane. Ki civwako kakeba ncyôci aci, nwamonu's, ki kufikaku ku dyumvwa ne kakavwa kazoolo to. Kavwa kaamukanku.

Nenku ki mushindu ngwôwò awu, mwena Kilisto yônsò udi mulediibwe cyakabidi ewu, paudi ulwa. Mangumba aukaadi mubwelebele nansha miikale bûngî kaayi, bûngî bwa mênà, bûngî bwa mikanda mûkaadi mukafundefunde dînà dyebe anyi nî mbinganyi, padi anu Dîyî dilelela dya Nzambi adi dishindikiibwa ne divwijiibwa dilelela kumpala kwebe mushindu awu, udi umanya ne wêwè udi mukanku, anu mwaba awu. Bwalu, cyokò-cyokò yônsò ya cikuka cya nzoolo ya ne: “Shaala mwena *cikampanda* ne shaala mwena *cikansanga*, ne nda mushindu *kampanda* ne mushindu *kansanga*” eyi, bidi anu ndukutukutu. Cidi ne bwalu ndisakidila dilelela, dya Dîyî ku Dîyî.

⁹¹ Padi civuba cibwela munda mwa—mwa mukaji, kabyena bikengela . . . Wêwè, kwêna mulwe civuba cya buntu cya kudi tatwêbè, ne pashiishe cintu cidi cilondà wêwè kushaala civuba cya kudi mbwa, ne cintu cidi cilondà ciikale cya kudi mpuusu, cintu cidi cilondà ciikale cya kudi nzoolo to. Cyônsò civwa anu civuba cya muntu pa cyôci.

Ne Mubidi wa Yesu Kilisto, Mukaji-musela, neikale citupa cya Mubidi Wende Yéyè. Newikale . . . Yéyè uvwa Dîyî, nenku nebikengele bwa Mukaji-musela ikale Dîyî; Dîyî disàkidila ku Dîyî, kusakidila ku Dîyî. Dibingishiibwa dya Luther, dijidiibwa dya Wesley, dibatiiza dya Nyuma Mwîmpè dya beena Mpenta, dyalujulula dya mapà, ne bikwabo byônsò bya Dyôdi adi abi, bidi byenda naaDi pamwe. Nwamonu anyi? Bidi bikengela ciikale Dîyî dyambakaja pa Dîyî, civuba cyambakaja pa civuba, Mwoyi mwambakaja pa Mwoyi, bwa kupatula cipidi cijima cya Mukaji-musela wa Mukalenge Yesu Kilisto. Mpindyewu, wavuluka ne, wêwè uvwa cyambiibwa.

⁹² Nenku mpindyewu, cintu cìdiku cidi ne, paanyima paa twètù bajandule bintu ebi, bya ne Kilisto udi uvwila Mukajimusela Wende, mpindyewu tudi tubwela mu Mukajimusela awu mushindu kaayi? S’ki lukonko ndwòlò alu.

Bààbùngì batu bamba ne: “Shaala mwena disangisha dyetu twètù.” Dimwe dya kudiwu diikale diswe mushindu kampanda wa dibatiiza. Dikwabo diswe kwenza *cikampanda* anyi *cikansanga*. Dikwabo dyambe ne: “Udi ne cya kwakula mu myakulu, bwa cyanaana kwèna muMupete to.” Dikwabo paadi dyambe ne: “Kabyena bikengela bwa wèwè kwakula mu myakulu to.” *Edi* nunku dyamba ne: “Udi ne cya kuja maja mu nyuma.” *Edi* nunku dyamba ne: “Udi ne cya kwela mbila.” *Edi* nunku ne: “Peta disaluka kampanda.” Byònsò abi’s bidi anu bilenga, kadi pashiishe, nansha nanku, byònsò mbya mashimi.

Mmunyi mudi muntu mulume udi...anyi mukaji, anyi mwànà wa Nzambi, udi mulediibwe kudi Nyuma wa Nzambi, mufwanyine kuvila Diyì dya Nzambi? Padibi ne, Nzambi Yèyè mwine udi umwija Dyòdì adi wamba ne: “Edi ki Dyòdì. Mémè ngwàkaDilaya. N’Dyòdì edi,” uleeja Dyòdì adi bitooke tòò mùdìDi mwa kwikala amu. Mona’s, s’badi ne cya kuDimona. Nwamonu anyi? Mmunyi mudi Kilisto mufwanyine kuvila Diyì Dyende Yèyè mwine? Ne piikalabi ne Kilisto udi munda mwebe, Aci kaciyena mwa kuvilaku Diyì Dyende Yèyè mwine to.

⁹³ Pa dībā adi tudi tubwela mu Mubidi ewu bishi? Kolinto wa Kumpala 12: “Ku Nyuma umwe tudi bònsò babatijiibwe mu Mubidi ewu, ku dibatiiza dimwe dya Nyuma Mwimpè.” Aci, wèwè muswe kucifunda, n’Kolinto wa Kumpala 12.13. “Ne ku Nyuma umwe nkutudi bònsò babatijiibwe.” Ne Nyuma m’Mwoyi wa Kilisto. Ncya bushuwa anyi? [Disangisha didi dyamba ne: “Amen.”—Muf.] Mwoyi wa Kilisto! Ne mwoyi wa dimiinu kana dyònsò edi...Bu mudibi ne, Yèyè uvwa Dimiinu-Diyì, udi ufikisha Dimiinu ku Mwoyi. Nwacyūmvù anyi? Piikalabi ne—piikalabi ne Mwoyi awu udi usanganyiibwa mu Dimiinu, ne dibatiiza dya Nyuma Mwimpè edi dilwa pa Wòwò, s’udi ne cya kutwadila Dimiinu adi Mwoyi.

⁹⁴ Anu mūmvwà munwāmbile, mu Phoenix emu, anu abidi adi panshi aa. Mvwa nyiikilangana ne Mwanetu John Sharrit. Mvwa nsanganyiibwa kuntwaku, kundeejaye mucì kampanda, mucì wa didimà. Yèyè—yèyè mmukwamishe madimà àbùngì. Ki kundeejaye mucì unwepele, uvwa wòwò mukwame bimuma bya mishindu mishiilangane mwandamukulu anyi citeema. Ki mémè kwamba ne: “Mwanetu Sharrit, awu mucì ngwa mushindu kaayi?”

Yèyè ne: “Mucì wa orange.”

Mémè ne: “Bwa cinyi mudiku bimuma bya mpusu, ne tundeelenyi, ne bya orange wa mutwile mbidi, ne bya mbòmà?”

Yèyè ne: “Byònsò abi mmadimà. Mmasomeka.”

“Kaa,” mûngààkambà, “ngũmvù. Mpindyewu, cidimu cìlwalwà, s’newukwame wònsò anu oranges bwal- . . .”

⁹⁵ “Kaa, to. Muci ne mucu newukwame bimuma byawu sungasunga. Ditamba ne ditamba nedikwame bimuma byadi sungasunga.”

⁹⁶ Bààbûngì beenu bàtù bàkwàmishà bimuma mbamanye aci, muneemu mu cibandabanda cya mici ya madimà emu. Nedikwame bimuma byadi sungasunga. Paudi usomeka ditamba dya mucu wa bimuma bya mpusu ku mucu wa orange, nedikwame bimuma bya mpusu, bwalu nngiikadilu wa didimà. Kadi, kadyakukwama cimuma cya ku cibangidilu aci to.

Nenku ki citudi twètù benze ncyôci aci. Tudi basomekemu, babwejemu twitabaayi, ne bikwabo, ne babisomeke mu cyònsò ne cyònsò, Apa. Mmunyi mudi ba-Méthodistes mwa kukwama cingà cintu cidu kacyi mwânà wa ci-Méthodiste? Mmunyi mudi dingumba kana dyònsò edi mwa kukwama cingà cintu cidu kacyi mwânà wa cyena mangumba?

⁹⁷ Kadi mucu awu wòwò anu mudidinge mupatule ditamba dya ku muji, adi nedikwame bimuma bya orange.

Ne pathiishe bu Nzambi mwa kwenzaku nî ncinyi nî ncinyi mu Ekeleziya, aci neciikale cya ku muji, pamwe ne Dîyi cyakabidi. Mmwômò. Bikengela biikale nanku, bwalu Mwoyi udi mu Muci awu, ne Wòwò udi ukwama mamuma a mushindu wa Wu sungasunga.

⁹⁸ Mpindyewu, patudi tujandula, mpindyewu, kudi ekeleziya munene awu udi mutentemuke, munda mwa bikondo, ukwama mamuma ende. Kadi padi matamba alekela kukwama mamuma, badi bààsonza. Mu Yone Munsantu 15, kabaakasonzaku Muci wa mvinyo awu to, mpindyewu. Yêyè wakasonza matamba, kuàkòsa, bwalu kaàvwa akwama mamuma to. Nenku—nenku twètù . . .

⁹⁹ Yesu mmuswe mamuma, bwa Yêyè mwine. Mukaj’Ende udi ne cya kulela bânà baa mushindu udi Ye Yêyè awu.

Nenku, yêyè kayi ulela bânà to, bânà-Mukaji-musela, bânà-Dîyi, pa dîbà adi mmwânà wa cyena mangumba. Nenku, dinanga dyende dya kumpala, dya maalu a pa buloba ne dingumba adi, ki kukaadiye mwalukile. Nenku kêna mwa kulela mwena Kilisto mulelela, mushuwashuwale, mulediibwe cyakabidi to, bwalu kakwena cintu nansha cimwe mwaba awu bwa kuMulela to.

¹⁰⁰ Bidi anu bu mùdì mwa kwangata ditamba dya mucu wa bimuma bya mpusu ne kudipayika muntwamu, nedikwame cimuma cya mpusu, kadi kadiyi mwa kukwama orange to, bwalu kadivwaku ku cibangidilu to. Kadi bu ne divwa didyanjila kuteeka kacya ku cibangidilu, didyanjila kumanya dya Nzambi, didyanjila kulongolola ne dilediibwe, didi ne cya kukwama orange. Kadyena mwa kukwama cingà cintu to.

¹⁰¹ Ki mushindu udibi ne Ekeleeziya wa Nzambi udi ne mwoyi, padi dībà dilwa. Muntu yònsò . . . Nzambi adidinge anu abange kwenza cintu kampana, muntu ne muntu udi wangata ndundu umba uya. Nwamonu anyi? Bitu misangu yònsò anu mushindu awu.

Mvwa mbala mu maalu malonda, pa bidi bitangila Martin Luther, anu abidi adi panshi aa. Bambe ne: “Kudi . . . Kabivwa bikole menemene bwa kwitabuuja ne Martin Luther uvwa mwa kutontolola ekeleeziya wa Katolike ne kubenga kunyookiibwa bwa bwalu abu to. Kadi,” mbambe ne, “cintu cya pawwaci, civwa mmwakapetaye mushindu wa kushaala kacya wambulula mutu kumutu kwa dikolesha dyònsò dya maalu dyakalondà ditabuluja dyende adi, kadi kushaala anu kacya wimanyina kamungulu pa dibingishiibwa dyende adi.” Nwamonu anyi? Anu bintu byònsò, ditentula ne byònsò, byakamulonda.

¹⁰² Tangilaayi Mandamu Semple McPherson, Aimee Semple McPherson, uvwa ne ntempelu ewu kaaba aka awu. Inābānzà muyiishi yònsò uvwa ne mapwapwa awu, ne uvwa wambula Bible mushindu umweumwe awu, anu—anu ditentula dya mu musunya’s!

Kabeena mwa kwikala baa ku muji to. Mushindu awu ki udi ekeleeziya kayiyi mwa kwikalaku to. Ekeleeziya umwe adidinge anu apete cintu cikwabo kampana mu cimenga, mukwabo ekeleeziya kēna mwa kucitwalaku to. Badi bacipeta anu paabo. Nwamonu anyi? Kabacyena baa ku muji kabidi to.

Dìyì dya Nzambi ndya ku muji. N’Dìyì, ne Didi ne cya kulelangana bilondeshile mushindu waDi; mushindu waDi mu muvù waDi, cisungula, cidyanjila kulongolola kudi Taatù, Nzambi.

¹⁰³ Mpindyewu tudi tubwela mu Ekeleeziya ewu mushindu kaayi? “Ku Nyuma umwe tudi bònsò babatiijiibwe mu Mubidi umwe, Mubidi wa Kilisto,” ùdi mwikale Mukaji-musela, Dìyì. “Babatijiibwemu ku Nyuma Mwîmpè.”

¹⁰⁴ Mpindyewu tumonaayibi ní tudi mu cikondo cya ndekeelu, anyi kî mmutudi. Mpindyewu tudi tusangana, twètù babuulule mu Genese, lwà ku, kaa, lwà ku nshapita mwi5, nudi kabidi mwa kubuulula mu Luuka ne kusangana ne, Henoka uvwa wa mwandamutekete kuumukila ku Noa. Henoka.

Bidi bikalenga dimiinu dya nyoka’s. Bwalu, piikalabi ne Kaayina uvwa mwānà wa Abele, pa nanku’s yêyè nguvwa wa mwandamukulu. Nwamonu anyi? Kadi mwaba nansha umwe mu Bible kabatuku bambe ne Kaayina uvwa mwānà wa Abele . . . anyi ne Kaayina—anyi ne Kaayina uvwa mwānà wa Adama to. Bwalu, aci, Bible mmwambe ne: “Yêyè uvwa wa mubi awu.” Kadi Adama pende kî nyêyè uvwa mubi awu to. Nwamonu anyi? “Yêyè uvwa wa mubi awu.”

¹⁰⁵ Mpindyewu tudi tusangana kaaba aka ne Henoka uvwa wa mwandamutekete kuumukila ku Noa, civwà ciikale cimfwanyi cya bikondo bya ekeleeziya. Mpindyewu, bantu bakwabo basambombo abu, kumpala kwende yèyè, baakafwa, kadi Henoka yèyè wakatementemuniyibwa. Henoka yèyè wakambwibwa, wa mwandamutekete awu, bileeja ne cikondo cya mwandamutekete cya ekeleeziya aci ki cidi cyangaciibwa mu Dyambwibwa. Mpindyewu, kakwena mpatà nansha ya kânà to, twètù mbadi mu cikondo cya mwandamutekete cya ekeleeziya. Twètù bônso kaayi tudi bacimanye.

¹⁰⁶ Mpindyewu, cikondo cya mwandamutekete cya ekeleeziya ncidi cyangaciibwa mu Dyambwibwa. Basambombo bakwabo bônso abu baakafwa. Kadi Henoka yèyè wakatementemuniyibwa, bwalu: “Yèyè kabaakamusangana to. Nzambi wakamwangata.” Kadi Henoka, mwambwibwe, civwa cimfwanyi cya bakwabo bônso bavwa benda bafwa abu. Kadi Mukaji–musela wa ci–cikondo cya nshiikidilu neabiikidiibwe pambelu paa... Dyambwibwa, kakuyi lufu to, neabiikidiibwe pambelu paa cikondo cya mwandamutekete cya ekeleeziya, cyòci cikondo citùdi twètù tufidila bujaadiki aci. Kaa, ekelekele! Twänjààyi kuumbula mpindyewu, mu ndondo menemene. Nwamonu anyi?

¹⁰⁷ Mpindyewu, mwaba ewu, kabidi, cimfwanyi cya bikondo mwandamutekete bya ekeleeziya, bìdì ne, mu Bwakabuulwibwa 10.7, bivwa bikengela bwa bwalu busokoka bunene bwa Mukanda buvunguludiibwe kudi Mukenji wa mwanjelo wa mwandamutekete.

¹⁰⁸ Mpindyewu, kudi Musanjeela muulu, misangu yônso, ne musanjeela pa buloba. Mwaku ewu wa mu Anglais *angel* [*mwanjelo* mu Ciluba–Muk.] udi uswa kwamba ne “musanjeela.” Nenu mu Mukenji wa mwanjelo wa mwandamutekete, pavwaye munkaci mwa kwenza ditangalaja dyende adi apu, mudimu wende wa bwambi, “dìbà adi paakabangaye kwela mpungi wa mudimu wende wa bwambi,” kì mpacivwaye ubangilaku to.

Yesu, pacivwaYe ubangilaku, Wakabanga ne dyondopa dya babeedi ne beena ntatu. “Kaa, Laabi munene wawa! Yèyè’s m’Muprofeta.” Muntu ne muntu uvwa uMujinga mu ekeleeziya wende.

Kadi paakasòmbaYe panshi dîngà dituku, kwambaye ne: “Mêmè ne Taatù Wanyi tudi Umwe,” aci kadi kushiilanganaci’s. Aci kadi kushiilanganaci. “Ne nwènù kanuyi badye munyiinyi wa Mwânà wa muntu, ne kanuyi banwe Mashi Ende to, kanwena ne Mwoyi munda mwenu to.”

“Mona’s, Yèyè’s mmukishi munù wa mashi a bantu!” Nwamonu anyi? Nwamonu anyi? Aci kadi kushiilanganaci’s.

Yèyè kaakacyumvwijaku to. Bòbò’s bakaavwa bamane kumona dimweneshiibwa, dishindika dya Dìyi dya Nzambi bwa

cikondo Cyende, divwijiibwe dilelela ne dibàjaadikile ne Yèyè ki uvwa Musanjeela awu wa cikondo aci. Nenku kabivwa bikengela bwa Yèyè kuumvwija kantu nansha kamwe to.

¹⁰⁹ Bayiidi abu bavwa bafwanyine kwikala kabayi bakumbane mwa kuCyumvwija to. Kadi bôbô baakaCiitabuuja, nansha bôbô bafwanyine kuCyumvwija anyi to. Baakashaala anu bapuwe kadi baCitàbùùje. Mmunyi muvwabo mwa kwamba ne nebadye munyiinyi Wende ne kunwa Mashi Ende? Mona's, kabivwaku mwa kwenzeka bwa kucyenzabo to. Kadi baakaCiitabuuja, bwalu bakaavwa balongolola. Yesu wakamba ne Yèyè "wakabasungula kumpala kwa difuka dya dyulu ne buloba." Nwamonu anyi? BaakaCiitabuuja. Nansha byôbî ne bavwa mwa kuCyumvwija, anyi to, bavwa batungunuke anu ne kuCiitabuuja.

¹¹⁰ Mpindyewu tangilaayi, mpindyewu, mu cikondo cya mwandamutekete cya ekeleeziya: "Paabanga mwanjelo wa mwandamutekete kwela mpungi, maalu masokoka a Nzambi avwa ne cya kumanyishiibwa anu mwaba awu," Bitampî's.

Aci, balongolodi bàvwà . . . bivwa bikengela bwa kwikalabo ne dibà diine's. Luther kaakashaala ne mwoyi ntanta bule bukumbane to, nansha Wesley kaakashaala ntanta mule to. Bikondo kabivwa bishaale ntanta bule bukumbane to, balongolodi abu. Bavwa ne mukenji wabo wa dituku adi, ne bantu bavwa bawubakula kadi kuwuvwija dingumba. Kadi ncinyi aci?

¹¹¹ Kwêna mwa kupitaku bufuki bukole to. Bufuki butu misangu yônsò anu bufila bujaadiki. Nzambi udi wenda mu ntungunukilu pamwe ne bufuki. Ki cidi ne cya kwenzeka.

Bu mudi dîbà. Dîbà didi dijuuka mu dinda, mmwânà mukese mulediibwe. Dicidi ditekete, kadiyi ne muunya wa wosha bikole to. Pa dîbà dikumi, dikaadi dipatuka mu cilongelu cibandile. Pa dîbà mujaalamu, dikaadi dibwela mu maalu adi atangila mwoyi. Pa dîbà isatu wa mapingaja, dikaadi dyenda dikulakaja. Pa dîbà itaanu, dikaadi dipûnga ne lufu. Dikulakaji ne diikale cyakabidi ditekete, dyalukila ditangile ku lukita. Awu ki ndekeelu wadi anyi? Didi dijuuka cyakabidi, padibu bucya mu dinda. Nwamonu anyi?

¹¹² Tanglaayi mici, mushindu udiyi yisampisha mabeji, byônsò bidiyi yenza abi. Mpindyewu tudi tusangana ne, mabeji adi amata ku mucu, apingana. Cinyi? Mwoyi ngudi upweka kwinshi ku muji wa mucu. Awu ki ndekeelu wawu anyi? Udi walukila cyakabidi mu muvù ùdì ùlondà wa bintu bitoloka awu, mwikale ne mwoyi mupyamupya.

¹¹³ Mpindyewu tangilaayi maekleeziya, mudiku kwenzeke cintu cimwecimwe aci mu Dilongolola. Ncibànde. Lutete lwa blé alu lwakamata mu buloba ne lwakafwa, mu dikengesha dya mu cikondo cya mîdimà aci. Lwakabwela mu buloba. Bivwa

bikengela kufwalu. Muntu yônsò, wetu wa nyuma ewu, udi mwa kuumvwa aci. Cya ne, dimiinu adi dyôdi kadiyi difwe ne dibole to, didi dishaala nkaayaadi. Nenku bivwa bikengela kubweladi mu buloba, mu cikondo cya mîdimà aci. Dyakashaalamu, e kuboladi. Ne kupatukadi mu tubeji tukese tubidi twa ekeleeziya wa ba-Luthériens. Mu ekeleeziya wa ba-Luthériens amu, dyôdi kupatwilamu tubeji tukwabo twàbûngî, Zwingli ne bakwabo. Kuumukila ku aci dyôdi kubànda ne kubwela mu mwepu, úvwà John Wesley, cikondo cinene cya mudimu wa ba-missionnaires. Dyôdi kupona cyakabidi. Mwômò amu kupatukamu cikondo ciseeswishanganyi aci, cikondo cya beena Mpenta aci. Lutete lwa blé alu, lùvwà . . .

114 Kudiku muntu, kaaba aka, ukààdikù mudime blé anyi? Tangila blé awu paudi umutangila apu. Paudi upatuka kwaka, udi wamba ne: “Ngaapeci blé.” Mbyenze anu bu ne udi ne blé mwaba awu’s. Anji pandà munda anu bîmpè bîmpè menemene kadi utangile. Kwêna ne blé mwine to nansha kakese. Cyûdi naaci’s ncizubu. Yesu kaakatudimwijaku, mu Maataayi 24.22 . . . ne inaayi anyi? “Mu matuku a ndekeelu, ne, nyuma ibidi ayi neyiikale mifwanangane menemene, mu mushindu wa bifwanyine kuseeswisha too ne blé musungula mwine bu ne bivwa mwa kwenzeka.” Nwamonu anyi? Mpindyewu tangilaayaaku. Ncyambudi.

115 Mpindyewu, Mwoyi wàkapàtukà mu Luther ki wôwò awu wàkenzà Wesley. Mwoyi wàkapàtukà mu Wesley ki wôwò awu wàkenzà Mpenta. Mwoyi udi upatuka mu Mpenta ngwôwò awu udi wenza blé. Kadi byôbî abi mbyambudi. Nwamonu anyi? Mwoyi mulelela udi upicilamu. Mukenji udi upicilamu, kadi Wôwò udi wenda ubànda ukabwela mu blé. Ki bwa cinyi blé awu udi ùbànda ne ukatwala cintu cyônsò mu kaabujima mu Dyambwibwa, lwà kuulu ku lusongo eku. Mukaji-musela, Yêyè mwine, udi ufumina mu cikondo ne cikondo cyônsò. Kadi cikolakola cya cyena mangumba aci cididifwa, cyuma ne cifwa. Nukaavwaku bamone, mu matuku a ndekeelu aa, mukaadici cibange kudikoka cyumuka mpindyewu amu anyi? Pakaadi blé awu ubanga kukola, pa dîbà adi ci—cizubu cididifwa cibanga kushiyangana nende Yêyè.

116 Pingaja anu mèsù umone mu kaablé kakese aku paudi ukatangila apu. Ûkàmùnùne mushindu ewu, nenku ukatangile munda mwaku amu kadi umone. Udi ne kaalutonga kakese kaa blé munda mwamwa. Bikengela wangate cyamu cya lumwenu lukenkeci cya bukole budi budyundisha misangu makumi asatu bwa kutangilamu, bwa kumona kaalutonga kakese kaa blé kadi munda mwamwa aku. Nwamonu anyi?

Kôkò aku kadi mwamwa menemene, kadi Kadi kabanga kukola. Mpindyewu, cizubu aci bikengela ciikale anuku, bwa kuKàkùba, bwa kuKàpèèsha mpunga wa kupatuka pambelu. Kadi pashiishe pakaadiKu kabanga kukola ne Mukenji ubanga

kutangalaka, dîbà adi cizubu cidi cibanga kudikoka ne kushiyangana naaKu. Ne Mwoyi udi upatuka buludi mu cizubu aci, ubwela buludi mu blé. Udi utungunuka! Mushindu awu ki udi cikondo ne cikondo cyônsò cyenze. Kacyenaku—kacyenaku mwa kupita bufuki bukole to. Cidi. . . Aci's ki ntungunukilu wa Nzambi nyêyè awu, mushindu udiYe wenza bintu.

117 Nenu mpindyewu ki cikondo citudi twêtù ne mwoyi mpindyewu mene ncyôci aci, cikondo cya mwandamutekete cya ekeleeziya. Mpindyewu, bikengela byônsò abi bimweneshiibwe mu lutete lwa blé ku ndekeelu, ne lukwabo lwalukila. Mpindyewu, bu nwênù mwa kwangata Luuka nshapita wa 17 ku mvensa wa 30, Yêyè wakamba ne: “Anu mwakadibi mu matuku a Sodoma, ki mwikalabi kabidi ku dilwa dya Mwânà wa muntu, paabanga Mwânà wa muntu kuDibuulula.” *Kubuulula* ncinyi? Kwenza dibuuludiibwa Dyende dya cidiYe mu dituku edi. Kubuulula, kubuulwila bantu, Dìyì didi dimanyishiibwe bwa dituku adi. Kubuulula, kubuulwila bantu, ku dimweneshiibwa dya Nyuma Mwîmpè mwikale wenza ne Yesu ikale ne mwoyi munkaci mwetu. Nenu, vulukaayi ne, Yêyè uvwa muleejiibwe kwaka mu muntu. Muntu's! Wakamba ne: “Anu mwakadibi. . .” Mpindyewu, Yêyè uvwa ubala anu Bible umwèumwè utudi tubala ewu, Genese. Mpindyewu, tudi tumona mu nshapita wa mu Genese awu, pavwa Yesu wakula bwa cyôci aci apu.

118 Tudi tusangana mwaba awu, ne, mu cyôci aci, mwikale ne nyima Wende mutuma ku ntenta, ne Sarah mu ntenta. Yêyè kwamba, Yêyè kwela lukonko. Bya bwalu mukaji awu kavwaku mwele meeji ne cìvwà ne cya kwenzeka aci cìvwa cìfwanyine kwenzeka to. Yêyè kwamba ne: “Mpindyewu, Abraham, Nênkumwènèkèlè bilondeshile cikondo cya mwoyi.” Nwamonu anyi? Kadi Sarah, mu ntenta amu, kucisekaye. Yêyè kwamba ne: “Sarah mu ntenta, waseki bwa cinyi, wamba ne: ‘Ebi bintu bidi mwa kwenzeka munyi?’”

119 Yesu mmulaye. Ne Ûvwa n'Yêyè. Abraham wakaMubiikila ne, “Elohim,” wa Bukole bwônsò. Ûvwa n'Yêyè. Mpindyewu, Bible udi udyanjila kwamba ne necyalukile cyakabidi mu matuku a ndekeelu. Yesu ngwákamba nanku. “Ne panwamona bintu ebi bibanga kwenzeka,” vulukaayi anu ne, pakaadi eci cibanga kwenzeka mushindu awu pa dîbà adi, ne, “nudi numanya ne cikondo cikaadi pabwîpi ku ciibi.”

120 Tangilaayi buloba bwôbò bwine. Tangilaayi buloba, Sodoma, piikalabi ne kukaadiku Sodoma wetu ewu. Tangilaayi mudi bantu ne maalu makudimika mu dikudimana dya kacya edi. Meeji abo mmakudimika. Bôbò kî mbamanyeku cidi nsômbelu wa kaneemu wetu ewu to. Tangilaayi numone bangondavi. . . [Katupa kaa mukaba wa mêyî munda mutupu—Muf.] . . . babakyanganyi baa balume ne balume ne bikwabo byônsò.

Kadi tangilaayi bakaji beetu, ditomboka didici cyenze. Tangilaayi numone ditomboka mu dipanga dya nsòmbelu wa kaneemu, nsòmbelu wa masandi munkaci mwa bakaji beetu. Ne kabiyi anu beetu. . .

Nudi nwamba ne: “Abu’s mba-Méthodistes.” S’ne beena Mpenta, kabidi. S’ncintu cyònsò mu kaabujima’s.

¹²¹ Tangilaayi balume beetu. Bòbò, pamutu paa kwela nzadi mu Dîyi dya Nzambi, mbakeele nzadi mu kaacilele kakese kaa cyena mangumba. Mbashaale kacya beelamu nzadi, pamutu paa kupatuka padibo bamona Nzambi uDimanyisha anu menemene. Kabingila kadi ne, mbampofu. Kabeenaku mwa kuCimona to. KabaadyakuCimonaku to.

Mpindyewu tangilaayaaku numone cidi cyenzeka mu cyôci eci, patukaadi tulwijakaja apa.

Ngeela meeji ne inăbànzà wawa ukaadi ukeba bwa twêtù kuumuka. Ngămònu uleeja ne cyanza, cintu kampanda anyi cikwabo bwa ne mmuswe bwa twêtù kupatuka, pa nanku bidi bikengela bwa twêtù kulwijakaja.

¹²² Pa nanku mpindyewu tangilaayi Henoka, cimfwanyi cya Ekeleeziya. S’ki yêyè ewu muleejibwe kabidi mu cimfwanyi mu cikondo cya mwandamutekete cya ekeleeziya. Nudiku mwa kukwelela meeji anyi? Cikondo cya mwandamutekete cya ekeleeziya! Monaayi. “Ku mwadi wa mpungi wa . . .”

¹²³ Mbanganyi badi biitabuuja ne nkulwe baamisanjeela mwandamutekete bwa ekeleeziya mwandamut-. . .? Kaa, tudi bònsò tuciitabuuja, patwikala twitabuuja Bible. Patwikala katuyi twitabuuja Bible, mu bushuwa bwa bwalu, nwamonu’s, katwena tuciitabuuja to. Kadi, mbalwe.

¹²⁴ Mpindyewu twêtù tudi ne mwoyi mu cikondo cya mwandamutekete cya ekeleeziya. Ne padi Bible mwambe nanku apu, cikondo cya mwandamutekete cya ekeleeziya eci ne: “Paabanga musanjeela wa cikondo cya mwandamutekete cya ekeleeziya kwela mpungi wa Mukenji wende, maalu masokoka a bintu byònsò bivwabo bakonyangajekonyangaje, munda mwa cikondo, neabuuludiibwe pa diine dîbà adi.” S’ki twêtù badi bacimona aba, Mwànà wa muntu ulwa munkaci mwa bantu Bende ne wenza anu menemene, ushindika Mukenji Wende bu muvwaYe mwambe ne Neënzè. S’ki twêtù badi bacisangana aba, mu cikondo cya ndekeelu eci mpindyewu.

¹²⁵ Ne bilù mwandamutekete, bu mudi bilù mwandamutekete, bivwà kampanda mulwe abi. Kaakalwa mu cilù cya kumpala, ciibîdi, ciisâtù, ciinâyì to, kadi wawalwa mu cilù cya mwandamutekete. Ûvwa ng’Henoka, wa mwandamutekete awu, wâkatentemunyiibwa. Nenku Noa, mwikale cimfwanyi cya bàshàadilè baa beena Yuda, byakakengela bwa bamwambulule kuulu. Mpindyewu, mu bikondo bya Bible, twákule bwa bilù.

Ne bufuku kabuvwa bukòsolola mu mēbà to, mu cikondo cya Bible.

¹²⁶ Mpindyewu teejejaayi ne ntema. Bwalu, nēndwijaakajē mpindyewu, bwalu bakaadi dijinga ne cibambalu eci. To. Bible kavwa mukòsolola, anyi—anyi . . .

¹²⁷ Bufuku kabuvwa bukòsolola mu mēbà to, mu cikondo cya Bible. Buvwa bukòsolola mu bilù. Kuvwa bilù bisatu. Mpindyewu, cilù cya kumpala civwa cibanga pa dībà citeema too ne pa dībà dikumi ne ibidi. Cilù ciibīdi civwa cibanga pa dībà dikumi ne ibidi too ne pa dībà isatu. Ne cilù ciisātù cya bufuku civwa cibadiibwa kubangila pa dībà isatu too ne pa dībà isambombo. Mpindyewu tudi ne isatu, isatu isatu, yidi yenza citeema, nomba udi kayi mupwangane to. Pa dībà adi tudi twalukila ku mwandamutekete bwa Dyambwibwa, dīikalà mwa kwenzeka, ngeela meeji, pankaci paa dībà isambombo ne dībà mwandamutekete . . . anyi paa dībà isambombo ne dībà citeema, dinda kampanda. “Bwalu mpungi wa Mukalenge neadile.”

Mu dinda adi dya dibalakana ne kadiyi
mavuba dyabiika bafwe mu Kilisto,
Biikale baabanyangana butumbi bwa dibiika
Dyende dya ku lufu;
Paadisanga basungidiibwe Bende mu
bisòmbedi byabo bya dyamwamwa dya
dyulu,
Paabiikilabo mēnà pa dibeji mwamwa muulu,
nēngīikalèku.

¹²⁸ Mwaku *dyambwibwa*, mu Bible, kī mmuteedibwemu mene to nansha kakese. Twētù mbadi beelemu mwaku awu cyanaana. Bible udi wamba ne, “bangaciibwe muulu; biikale bangaciibwe muulu.” Tudi tubala mwaba ewu mu Tesalonika Mwibīdi . . . Anyi, Tesalonika wa Kumpala, cidī ndilondangana dya Dyambwibwa dinene edi dīikalà mwa kwenzeka mu matuku a ndekeelu. Teejejaayi eci mwaba ewu. Netubange mwaba ewu ne mvensa wa 13:

. . . *Ncyēna muswe bwa nwēnù. . . bapange to, bānà beetu, pa bidi bitangila aba badi balaale tulu, bwa nwēnù kanwikadi mu cinyongopelu, bu mudi bakwabo badi kabayi ne ditekemena.*

Bwalu patwikala twitabuja . . . Kilisto wakafwa ne wakabiika cyakabidi ku lufu, bya mwomumwe kabidi aba . . . badi balaale tulu mu Yesu Nzambi nealwe naabo pamwe nende.

Bwalu tudi tunwambila bwalu ebu ku dīyī dya Mukalenge ne, twētù badi ne mwoyi ne badi bashaale too ne ku dilwa dya Mukalenge katwakupangisha . . . (Mwaku awu kupangisha udi uswa kwamba ne “kucyamakana.”) . . . aba badi balaale tulu to.

Bwalu Mukalenge yêyè mwine neatuuluke . . .

Mpindyewu teejejaayi ne ntema:

. . . Mukalenge yêyè mwine neatuuluke mu maułu ne lubila, kabidi ne dîyi dya mwarkanjelo, ne . . . mpungi wa Nzambi: ne bafwe mu Kilisto nebabiike ku lufu dyambedi: . . .

129 Mpindyewu ndi muswe bwa numone cintu cinene cidici cyenzeka mwaba ewu mpindyewu. Eci kacinupiciku to. Nwamonu anyi? Mpindyewu monaayi. Dîyi didi dyamba mwaba ewu, mu Tesalonika Mwibîdi emu ne, kudi bintu bisatu. Monaayi. Kuumukila ku mvensa wa 13 too ne ku wa 16, kudi bintu bisatu bidi ne cya kwenzeka kumpala kwa Mukalenge Yêyè mwine kumwenekaye. Lukasalukasa mpindyewu, bwa twamona mwa kwoya. Nwamonu anyi? Cintu cya kumpala cidici cyenzekà . . . Monaayi: lubila, dîyi, mpungi. TuCibalaayi mpindyewu bwa kumona nî ncyabushuwa. Nwamonu anyi?

Bwalu Mukalenge yêyè mwine (mvensa wa 16) neatuuluke mu dyulu ne lubila, kabidi ne dîyi dya mwarkanjelo, ne . . . mpungi wa Nzambi: . . .

130 Bintu bisatu mbidi byenzeka: Dîyi . . . Lubila, dîyi, mpungi, bikengela byenzeke kumpala kwa Yesu kumwenekaye. Mpindyewu, lubila . . . Yesu udi wenza byônsò bisatu abi padiYe—padiYe—padiYe—wenda utuuluka apu.

Lubila, lubila alu ncinyi? M’Mukenji mwikale upatuka, dyambedi, Dyâmpâ dya Mwoyi dîdi ne mwoyi diikale dipatula Mukaji-musela.

131 Mpindyewu, Nzambi utu ne mushindu kampanda wa dyenza maalulu. Ne Yêyè katu ushintululaku ngenzeli Wende nansha. Yêyè katu ushintululaku Wende ngenzel- . . . Yêyè udi Nzambi utu kayi ushintululuka. Mu Amosa 3.7, Yêyè mmwambe ne Yêyè kavwa mwa kwenza cintu wenza nansha cimwe pa buloba Yêyè kayi mwanji kucibuulwila dyambedi basadidi Bende baprofeta to. Ne anu mudibi bulelela ne Yêyè wâkacilaya awu, Yêyè neaênzè.

132 Mpindyewu, tudi bapicile mu bikondo bya ekeleeziya. Kadi mbatulaye mu matuku a ndekeelu, bilondeshile Maalaki 4 ne, nekwikale cyakabidi dyalukila, dya muprofeta kampanda mu ditunga. Aci ncyabushuwa. Monaayi ngiikadilu wende, ciikalaye mufwanangane naaci. Yêyè utu misangu yônsò . . .

Nzambi udi ukwata mudimu ne nyuma awu misangu yitaanu: musangu wumwe mu Eliya; mu Elisha; mu Yone Mubatiiji; kubiikila Ekeleeziya bwa kupatuka; bâshââdîlè baa beena Yuda. Misangu *yitaanu*, “ngâsâ,” J-e-s-u-s [Yesu—Muk.], f-a-i-t-h [diitabuujâ], ne cidici nombâ wa ngâsâ. Nwamonu anyi? Eyo.

133 Mpindyewu, nwavulukaayi ne, Mukenji mmulayiibwe. Ne piikala maalulu masokoka ônsò mamana kuswikakajangana

tusumbu tusumbu kudi musumbà wa balombodi baa ntendeleelu, nebikengele mu—muprofeta wa ufumina buludi kudi Nzambi bwa kuCibuulula. Nenku aci's ki cyôci menemene cyakalayaYe bwa kwenza. Nwamonu anyi?

¹³⁴ Mpindyewu, vulukaayi: “Dîyi dya Mukalenge ditu dilwa kudi muprofeta,” kî nkudi mwena teoloji to. Muprofeta, yêye mmuleeji wa cimfwanyi cya Dîyi dya Nzambi. Yêye kèna mwa kwamba cintu nansha cimwe to; kèna mwa kwamba ende meeji sungasunga to. Yêye udi mwa kwamba anu cidi Nzambi ubuulula. Nansha mene muprofeta Baalama paakateeciibwaye bwa yêye kusumbishiibwa, bwa kusumbishaye bukenji bwende, yêye wakamba ne: “Mmunyi mudi muprofeta mwa kwamba cintu kampanda cidi Nzambi kayi muteeke mukana mwende?” Ncintu cidi Nzambi wenza, mu mushindu wa kuyi mwa kwambaku cingà cintu nansha cimwe to. Ne wêwè udi mulediibwe mushindu awu. Anu mudibi ne kwèna . . .

¹³⁵ Bu wêwè mwa kwamba ne: “Ncyèna—ncyèna—ncyèna mwa kutabala to,” paudi utangila apu. Nwamonu anyi? Kwèna mwa kucyenza to. Kwèna mwa kwolola cyanza to, peebe ne mushindu wa kucyolola. Nwamonu anyi? Kwèna mwa kwikala mbwa peebe mwikale muntu to. Nwamonu anyi? Udi mwenjiibwe anu mushindu awu.

Ne Nzambi pende ukaadi anu mwenzenze, misangu yônsò, munda mwa bikondo, kupicila ku Yeshaayi, Yelemiya ne bônsò abu, Eliya, mu bikondo bikaadi bipite abi. Pavwa cisumbu cya balombodi baa ntendeleelu cifwanyine kubwejakajangana bintu byônsò, Yêye uvwa mwa kutuma muprofeta, umujuula mwikale ufumina ku mwaba kawuyi mumanyike to. Yêye kavwa wa mu maalu abo avwa enzeka awu to, kadi uvwa wamba Dîyi Dyende. Ubiikidiibwa bwa kuumuka mu cyalu, uya, biikale anu bantu bakayabale biikale ne Bulelela bwa Nzambi. Kabidi bitu misangu yônsò anu mûdi mwa kumumanya. Yêye wakamba ne: “Kwôkô kwikale muntu kampanda munkaci mwenu udi wa nyuma anyi muprofeta . . .”

¹³⁶ Mpindyewu, baprofeta. Kudi cintu bu mudi “dipà dya ciprofeta” mu Ekeleeziya; kadi muprofeta yêye mmudyanjila kulongolola ne mudyanjila kuteeka bwa dîbà adi. Nwamonu anyi? Eyowa's, mukalenge. Mpindyewu, ciprofeta cyôci cipatuke, bikengela bantu babidi anyi basatu basombe ne balumbulwishe bwa kumanya ne ncyà bushuwa anyi kî ncyà bushuwa, kumpala kwa ekeleeziya kucyakidilaye.

¹³⁷ Kadi muntu nansha umwe kavwa ukasômba kumpala kwa muprofeta to, bwalu kakuyi mpatà to yêye uvwa—yêye uvwa Dîyi dya Nzambi. Yêye uvwa Dîyi adi mu dituku dyende. Nudi bamone Nzambi udileeja mu cimfwanyi. Mpindyewu, Nzambi utu mulaye bwa kututumina cyakabidi cyôci aci mu matuku a ndekeelu, bwa kupatula Mukaji-musela mu cimvundu cya

bukwǎntèndeleeleu aci, mu mushindu umwepele udici mwa kwenjiibwa awu.

138 Kacyadyakwenjiibwaku to; ekeleeziya kēna mwa kwakidila Kilisto to. Twētù, beena Mpenta aba, katwenaku mwa kutungunuka ne Mukenji ewu mu ngiikadilu udi ekeleeziya usanganyibwa leelu ewu ewu to. Mmunyi mutwakumbaja cikondo cya nshiikidilu mu ngiikadilu udibo leelu ewu ewu, padibo muntu ne muntu ulwishangana ne mwinende, ne bikwabo byônsò, ne biine abi mu mushindu wa ntendeleeleu? Kaa, luse webe! S’ncimvundu’s. Cikaadi cimane kuya mu mangumba. Ne pa dîbà kana dyônsò. . . Ndi ndomba mufundi wa maalu malonda nî nganyi nî nganyi bwa—bwa—bwa kwambaye ne kî mmwômò. Musangu wônsò uvwa mukenji upatuka pa buloba, ne pavwabo bawuwija bulongolodi, ùvwa ùfwila anu piine apu. Ne Mpenta mmwenze cintu cimwecimwe cyakenzabo bônsò aci, Mpenta udi mupatuke awu’s.

139 Nwênù, beena Assemblées de Dieu aba, paakapatuka bankambwa beenu balume ne bakaji mu malongolodi miine awu kale wawa, mu Nsangilu munene wa kale wa Bantu bônsò awu, baakeela mbila ne baakatumbisha Nzambi, ne baakaakula balwishangana ne bintu abi. Kadi nwênù nukudimuka, “anu mudi mbwa walukila ku bilushi byende, ne ngulube ku bitoci byende,” kadi nwênù kwenza anu cintu cyôci cimwecimwe cyakenzabo bôbò aci. Nenu mpindyewu nukaadi batendeleedi baa mu umwe, mu mushindu wa nukaadi bakange ne myoyi yenu ya luse. Bikengela kwikala ne karta kaa buumambala kumpala mene kwa kuswikakana neenu, bikole be.

140 Nwênù, ba-Unitaires, Nzambi kunupa mukenji wa mushindu awu, kadi pamutu paa nwênù kuya kumpala, ne kushaala balame didipwekesha ne kuya kumpala, kukengelabi bwa nwênù kutekesha mwonji kadi kuvwija cisumbu cyenu bulongolodi. Kadi nukaadi penyi nwênù bônsò? Mu mbekeci umwëumwë awu. Aci’s mmwômò.

Kadi Nyuma wa Nzambi, mutungunuke wenda uya. “Mémè Mukalenge ngudi muCikune. Mémè ngwaCimyamina mâyi, muunya ne bufuku. Bwa muntu kalu. . .” Yêyè ngwâkatèeka bwa bintu ebi kwenzekabi, ne Yêyè udi ne cya kutuma Cyôci eci.

141 Cintu cya kumpala cidì cilwa, padiYe ubanga kutuuluka mu Dyulu, kùdi lubila. Ncinyi aci? M’Mukenji, bwa kusangisha bantu pamwe. Mukenji udi upatuka, dyambedi. Mpindyewu, cikondo cya kulongolola kwa myëndù: “Juukaayi nulongolole myëndù yenu.” Civwa ncilù kaayi aci? Cya mwandamutekete, kî nciisambombo to. Cya mwandamutekete: “Monaayi, Mubaki nyawu ulwa. Juukaayi nulongolole myëndù yenu.” Ki kujuukabo. Bamwe baa kudibo kusanganabo ne kabavwa nansha ne Maanyi mu myëndù yabo to. Nwamonu anyi? Kadi ncikondo cya kulongolola kwa myëndù.

Ncikondo cya Maalaki 4. CivwaYe mulay-. . . N’Luuka 17. Cidi—cidi n’Yesh-. . . Biprofeta byònsò abi bìdìCi citeeke anu menemene mu dilondangana bwa dituku edi, mu Mifundu abi, tudi tubimona ne mwoyi anu mwaba awu. Kakwenaku. . .

¹⁴² Mona mudi bintu ebi byenzeka, wêwè mwaneetu wa balume munanga, wêwè mwaneetu wa bakaji munanga. Padibi ne, Nzambi mu Dyulu mmumanye ne ndi mufwanyine kufwila pa cibumba cya ku cyambilu eci anu patudi twakulangana apa. S’bivwa bikengela wêwè—wêwè kwanji kwendakanaku eku ne eku katanci. Cidi anu. . . Mbilenga bya dikema, panudi numona Nzambi ufuma mu Dyulu, wimana mwaba awu, udileja Yèyè mwine anu mukaadiYe mwenzenze. Ne aci’s m’Bulelela, ne Bible ewu mubuulula. Nwamonu anyi? Cya bushuwa. Tukaadipu.

¹⁴³ Ne ndongolwelu wa cyena mangumba mmufwe. Bwende bukaadi butuuke kujike. Kaadyakujuukaku cyakabidi to. Neoshiibwe. Aci’s ki cinutu nwenza ne bizubu mu budimi. Munyeemaayi. Bwelaayi mu Kilisto. Kanwambi ne: “Ndi wa mu ba-Méthodistes. Ndi wa mu ba-Baptistes. Ndi wa mu beena Mpenta” to. Bwelaayi mu Kilisto.

Pawikala munda mwa Kilisto, kakwenaku Dìyì difunda Mwômò emu Dyûdì kuyi witabuuja to. Cidi nî nganyi nî nganyi mukwabo mwambe nansha ciikale cinyi. Ne pashiishe Nzambi udi umwenesha cintu aci. Bwalu, wêwè, padiYe upongolola Nyuma pa Dìyì, cidi cyènzekà ncinyi? Bidi anu bu kwela kwa mâyì pa dimiinu dikwabo kana dyònsò edi. Nediikale ne mwoyi, ne Dyôdi nedivulangane bilondeshile mushindu waDi.

¹⁴⁴ Wêwè udi wamba ne: “Ndi mupete dibatiiza, Nyuma Mwimpè.” Aci kaeyena ciswa kwamba ne udi musungidiibwe nansha, bwa aci kaayi ciyiile anu kwaka.

¹⁴⁵ Tangila kuneeku. Wêwè udi muntu pasatu. Ki cyûdì. Munda mwa mwânà mukese udi apa ewu mudi musuuka, cidi cilondà cidi nnyuma, ne cidi cilondà cidi mmubidi. Mpindyewu, wêwè udi ne byumvwilu bitaanu mu mubidi ewu, bwa kwikala kupetangana ne cisòmbelu cyebe cya pa buloba. Byôbi abi kabiyena bipetangana ne bikwabo byaci to. Udi ne byumvwilu bitaanu bya nyuma, apa: dinanga ne kondo kaa mwoyi, ne bikwabo, bya cyôci aci. Kadi munda emu ki mùdì wêwè musòmbèle. Ki cyûdì ncyôci aci.

¹⁴⁶ Yesu kaakambaku ne: “Mvula utu ulokela bîmpè ne babi” anyi? [Disangisha didi dyamba ne: “Amen.”—Muf.] Teeka mpoopu mwaba ewu, ne blé pàâpa naka, kadi ubimyamine mâyì, ne ubilame mu mwaba wa bufukà ne bintu bya mushindu awu, byònsò bibidi abi kabyakwikala ne mwoyi ku mâyì amweamwe awu anyi? [“Amen.”] Bushuwa’s. Ee, ncinyi aci? Cimwe cya kudibi necikwame mpoopu, bwalu ki cyònsò cidiye

yêyè. Mpoopu neèlè byanza muulu ne neèlè mbila mushindu anu umweumwe ne blé.

¹⁴⁷ Bible kèna wambaku ne: “Mu matuku a ndekeelu, nekulwe ba-Kilisto baa mashimi” anyi? [Disangisha didi dyamba ne: “Amen.”—Muf.] Mpindyewu, kaciyi “ba-Yesu baa mashimi” to. “Ba-Kilisto baa mashimi,” beela maanyi, beela maanyi baa mashimi pa bidi bitangila Dîyî; beela maanyi baa cyena mangumba, kadi kabayi baa Dîyî to.

Bwalu, Dîyî nedidifidile Dyôdi diine bujaadiki. Kadyena ne dijinga dya cintu cikwabo nansha cimwe to. Nedidifidile Dyôdi diine bujaadiki.

“Nenku nekulwe beela maanyi baa mashimi.” Nudi ne mukaba wanyi wa mèyi pa cyôci aci. Ne adi dilaabiib- . . .

Kaa, bu wêwè mwa kubiikila umwe wa kudibo, kwamba ne: “Kaa, wêwè, udi Yesu anyi?”

“Kaa, ncyà bushuwa ne ncyêna aci to.” Kî mbafwanyine kutwalaku aci to.

¹⁴⁸ Kadi pakaadibi bikafika ku ne “Kaa, butumbi’s we! Mémè ndi mupete dilaabiibwa!” Diine adi’s ndilaabiibwa anu dyetu dya cya bushuwa edi. Vulukaayi ne, Kaayifa uvwa pende naaDi, yêyè awu, ne wakamba ciprofeta. Nansha Baalama pende’s uvwa naaDi, ne wakamba ciprofeta.

Kadi aci kacylene ne dipetangana ne *eci* to, munda. Amba anu aci ciikale dimiinu dya Nzambi, mutoloku Wende kacya ku cibangidilu, mudyanjila kulongolola, bwa cyanaana kwebe nkujike. Nansha wêwè mwele mbila munyi, mwakule mu myakulu, munyeemakane, mwele mbila. Aci kacylene ne dipetangana naaci to.

Mpoopu udi mwa kudibala anu mudi bikwabo abi. Mémè nkaadiku mumone bampangaanu bajuuka, beela mbila, ne baakula mu myakulu, kadi—kadi banwina mashi mu kabalubalu kaa mutu wa muntu, kadi kusoka dyabulu. Nwamonu anyi? Pa nanku kwèna. . . Dyônsò dya ku masaluka awu ne bikwabo, ubipwe mwoyi.

Cidi ne bwalu mmwoyi webe wêwè mu Dîyî adi, ne cyôci aci ki Kilisto. Udi bweje Dyôdi adi munda amu, kadi umone mudiDi diDimanyisha, mushindu udiDi dikanguka anu mudi dimiinu dikwabo dyônsò edi amu, ne diDileeja bwa cikondo cidiDi ne mwoyi.

¹⁴⁹ Luther kavwa ne ciwaye mwa kutwala to pa kuumusha lutonga. Bakwabo aba bavwa mwa kutwala bikwabo bintu ebi. Tukaadi twètù mu cikondo cya blé mpindyewu.

Bivwa bikengela bwa beena Luther bashuwashuwale baa Luther kutwalabo Luther mushuwashuwale. Bivwa bikengela bwa mpenta mushuwashuwale kutwalaye mpenta

mushuwashuwale. Kwajiki. Kadi twètù tukaadi bapite aci cikondo, biikale tutungunuka.

¹⁵⁰ Nudi bamanye ne, ekeleeziya wa Katolike, yêyè awu, ki wâkabanga cyena mpenta anyi? Nenku bu ekeleeziya wa beena Mpenta mwa kushaala kacya wimana munda mwa bidimu binunu bibidi, mmufwanyine kwikala mu mushindu mubiipe kupita cidì Katolike mpindyewu eci. Aci's mmwômò. Bândì ngambila ciine aci abu's mbânà beetu baa balume, bânà beetu baa bakaji, bândì munange. Ne Nzambi mmumanye cyôci aci. Kadi vulukaayi, nwênù balunda baanyi, nebikengele bwa nkatwilangane neenu ku Cilumbulwidi kwaka. Ne kwine aku kudi mwa kwikala kakuyi ntanta mupitepite bule to. Bikengela bwa mfile bujaadiki bwa cidì Bulelela.

¹⁵¹ Pângààkapàtukà kuya neenu bwa kwenza masangisha, ngenda nsambidila babeedi, apu kaayi bivwa bilenga. Kadi, pândì ndwa ne Mukenji! Piikala Mukenji kana wônsò upatuka, m'Mukenji mulelela. . .

Cyôci ciikale bishima bilelela, bishwashuwale bya Nzambi, kadi kacya byashaadila anu mu bulongolodi abu, s'nudi numanya ne kî mbya kudi Nzambi, bwalu cintu aci ncimana kwamba patooke.

Yesu wakapatuka ne wakondopa babeedi, bwa kukoka ntema yabo, ya bantu, pashiishe Mukenji Wende. Ncya bushuwa.

Bikengela Wôwò awu wikale ne cintu kampanda ciikalà Nzambi mwa kubweja. Yêyè udi anu. . . Dyondopa dya kudi Nzambi, bishima Byende mushindu awu, bidi anu bikoka ntema ya bantu cyanaana. Cya mushinga cya Ci m'Mukenji. Ki mwaba ngôwò awu udi, cidì cifuminà munda *emu*. Yêyè udi uteeta kulengelela bantu, bwa kusombabò ne kuMuteeleja, nwamonu's, bwalu kudi bamwe baa munkaci mwabo amu badi balongolwela Mwoyi.

Yimwe ya ku ntete, ya blé ayi, yakamata panshi, nyuunyi yakayizokola. Ne mikwabo yakamata munkaci mwa mēbà. Ne mikwabo yôyi, yakaya mu buloba bulongolola, buloba budyanjila kulongolola, ne yakakwama.

¹⁵² Mpindyewu, ki cintu cya kumpala ncyôci aci, mmwadi wa mpungi. Cintu cya kumpala mmpungi ne. . . anyi dīyī. . . Lubila; ne pashiishe dīyī; ne pashiishe mpungi.

Lubila: musanjeela mwikale ulongolola bantu.

Ciibîdî ndīyī dya dibiisha dya ku lufu: dīyī dimwedimwe adi, dīvwà, dīyī dikole mu Yone Munsantu 11.38-44, dyàkabìikilà Lazàrò bwa kupatukaye mu lukita adi.

Kukungwija kwa Mukaji musela; ne pashiishe dibiisha dya bafwe, nwamonu's; bwa kwangaciibwa muulu ne Cyôci aci. Mpindyewu tangilaayi bintu bisatu bidì byènzekà abi. Cidì cilondà ncinyi? Civwa mmpungi. Dīyī. . . Lubila; dīyī; mpungi.

153 Mpindyewu, cintu ciisâtù, mmpungi, yêyè, misangu yônsò, ku Difesto dya Mpungi, ngutu ubiikila bantu ku difesto. Nenku aci ki cìikalà Didya dya diloolo dya Mukaji-musela, Didya dya diloolo dya Mwânà wa mukooko ne Mukaji-musela, mu dyulu. Nwamonu anyi?

154 Cintu cya kumpala cìdì cipatukà m’Mukenji Wende, ubiikila Mukaji-musela bwa kudikungwija. Cintu cìdì cilondà ndibiishiibwa dya Mukaji-musela udi mulaale tulu; aba—aba badi bafwe, mu bikondo bikwabo bidi bishaale byabya, badi babakungwija. Ne mpungi, Difesto mu maulu, mu dyulu. Mona’s, ki cintu cidi cyenzeka ncyôci aci, balunda baanyi.

155 Anu mwaba awu mene ngukaadiku, badilongolole mpindyewu. Cintu cimwepele, Ekeleeziya udi upatuka awu, bikengela ashaale muteeka kumpala kwa Mwânà, bwa abobe.

Katumba kanene kaa dinowa naaku nekalwe, paanyima paa katanci. Blé neoshiibwe, bikolakola’s, kadi ntete yôyi neyikungwijiibwe mu diyeeba dya Cyôci aci. Nwamonu anyi?

156 Nwênù kanwena bampofo to. Nudi—nudi bantu baa luumvu.

Kadi bu ne mvwa mwimane mwaba ewu ngamba bintu abi ne kansungansunga? Ndi nCyamba bwalu Cidi Mwoyi, bwalu ndi mwambule bujitu bwa kudi Nzambi bwa kuCyamba. Nenku ndi ne cya kuCyamba. Ne Mukenji wanyi. . . Dîbà dyônsò mwikale mumanye, kale wawa mu dyondopa ne bikwabo byônsò mushindu awu civwa anu bwa kukoka ntema ya bantu cyanaana, mumanye ne Mukenji uvwa ulwa. Kadi’s ki Wôwò ewu. Ne Bitampi Mwandamutekete abi byakakanguka, maalu masokoka awu, ne kuleeja ne bintu abi ki bidi byenzeke. Ncivwa mucimanye to.

157 Kadi kudi bantu biimane mwaba ewu mpindyewu mene, bàvwà biimane anu pamwe naanyi menemene. Dîbà adi, nwênù bônsò nuvwa bangumvwe pâmvwà muyiishe diyiisha adi dya ne: *Bakalenge, Tudi Dîbà Kaayi?* Mu dinda adi, anu menemene mwaba uvwaCi cyambe ne neCiikale awu, ki Banjelo mwandamutekete mbôbò abu biimane mwaba awu mene, bafumine mu Dyulu. Ne paâakabândàBo muulu apu, ne mvunda ùbànda naaBo muulu mwamwa, twêtù biimane, batangile mvwaBo benda baya amu, beena maalu a mamanya kuCikwatabo fôtô, mu ditunga dijima amu, too ne mu Mexique.

158 Ki mwaba awu, pâmvwà ntangila apu, dîngà dituku, pângàakabangà kuyiisha *Bikondo Mwandamutekètè Byà Ekèleeziyà* ebi, ki mêmè kubiikila Jack Moore, mwena teoloji munene, mêmè kwamba ne: “Jack, ewu Muntu udi mwimane mwaba wawa Nganyi? ‘Padi Kampanda mufwanangane ne Mwânà wa muntu mwimane mwaba awu, ne nsuki mitooke bu myôsà ya mukooko.’” Mêmè ne: “Ûvwa Nsongaalume, mmunyi muvwaYe mufwanyine kwikala ne nsuki mitooke bu myôsà ya mukooko?”

159 Yèyè ne: “Mwaneetu Branham, awu uvwa mmubidi Wende mutumbishiibwe.” Aci kacyakumvwika bu cyòci to.

Kadi pângàakabwelà mu cibambalu ne mèmè kubanga kusambila, Yèyè kummanyishaci ne civwa ncikampanda. Nwamonu anyi?

160 Nkaadi misangu yònsò muyiisheyiishe ne Yèyè uvwa Nzambi, kayi anu muntu patupu to. Yèyè uvwa Nzambi mumweneshiibwe mu mubidi: Nzambi, cyambiibwa cya Nzambi, cya dinanga aci; byambiibwa binene byàkatùlùkà, byàkaleejiibwà panu pa buloba, bya Nzambi abi. Yesu uvwa ndinanga dya Nzambi, divwà diibake mubidi uvwa Yehowah Yèyè mwine musòmbèlemù awu. Yèyè uvwa kaabujima kaa Bunzambi mu ciikadilu cya mubidi. Cìvwà Nzambi aci, Yèyè wakacileejila mu mubidi awu. Bivwa bikengela bwa mubidi awu ufwe, bwa Yèyè kumona mwa kusukula Mukaji musela ne Mashi Ende—Ende—Ende.

161 Kadi monaayi ne, Mukaji-musela kèna anu musukudiibwe, mufwidiibwe luse cyanaana to, kadi mMubingishiibwe. Nwamonu anyi? Nukaadiku bateete kumona mwaku ewu *mubingishiibwe*, bwa kumona ne cidiwu uswa kwamba ncinyi anyi?

Mpindyewu, cileejilu, bu Mwaneetu Green muumvwe bamba ne mèmè mvwa munkaci mwa dinwa maala, munkaci mwa dyanza bintu bibi, pashiishe yèyè kulwa kusangana ne ncyèna mubyènzè to, kadi kulwaye, kwamba ne: “Ngaakufwidi luse, Mwaneetu Branham.”

162 “Umfwila luse? Kacya neitu mucyènzèku to. Alu luse lùdì umfwila ndwa bwalu kaayi?” Nwamonu anyi? Kadi byòbì ne ndi mupiile, pa dībà adi’s ndi mwa kufwidiibwa luse; kadi ndi anu nciyi mwakane to, bwalu’s nyawu ndi mucyènzè.

Kadi mwaku ewu *mubingishiibwe* udi wumvwija ne “byenze bu ne kutu mucyènzèku kacya to, nansha kakese.” Mubingishiibwe’s! Ne pa dībà adi Mashi a Yesu Kilisto adi atukezula ku mpekaatu mu mushindu wa ne, mmwediibwe mu Mukanda wa cipwamwoyi cya Nzambi. Yèyè ki Helè udi mwa kucyenza.

163 Twètù katwena mwa kucyenza to. Twètù tudi mwa kufwa luse kadi katuyi mwa kupwaku mwoyi to. Mèmè ndi mufwanyine kukufwila luse, kadi ndi anu mvuluka misangu yònsò ne utu mwenze bintu bibi ebi. Pa dībà adi, kwèna mwakane to; udi mufwidiibwe luse.

Kadi, ku mèsù kwa Nzambi, Mukaji-musela mmubingishiibwe. Katu mwanji kucyenzaku to, kacyakacya. Amen. Mwimane mwaba awu, musediibwe kudi Mwànà wa Nzambi mulenga kayi kadyuwu; kayiku mwanji kwenza mpekaatu to, kacyakacya. Bwa cinyi? Yèyè uvwa mudyanjila kulongolola. Úvwa mubùcikidiibwemu pende nanku. Nenku

mpindyewu paaluYe kuumvwa Bulelela ne kupatuka, ki Mashi kuMukezulawu. Nenku Yêyè mmwimane mwaba awu, mulenga kayi kadyuwu. Nwamonu anyi? Yêyè, kayi ne mpekaatu pambidi Pende to, nansha kakese.

¹⁶⁴ Ki bwa cinyi, Mukenji udi ubiikila Mukaji-musela ku didikungwija, nwamonu's, lubila.

Nenku mpungi . . .

Umwèumwè awu, Yêyè, mwikale ne dîyî dikole, Wàkasàma ne kwela kwa lubila alu ne dîyî, ne wakabiisha Lazârô. Ne dîyî dikole Yêyè kwela lubila ne: "Lazârô, patuka." Nwamonu anyi? Nenku dîyî didi dibiisha—dibiisha Mukaji-musela udi mulaale tulu awu, bafwe badi balaale tulu abu.

¹⁶⁵ Nenku mpungi, "mwikale ne mwadi wa mpungi." Nenku, padiye wenza nanku apu, udi ubiikila. Misangu yônsò, mpungi uvwa anu ubiikila Izaleela ku Difesto dya Mpungi. Nwamonu anyi? Bu muvwabi ne, divwa n'Difesto dya mpenta, Difesto dinene mu dyulu; ne Difesto dya Mpungi. Nenku, mpindyewu, ncyá bushuwa ne mpungi utu umanyisha dibiikila dya didikungwija ne: "Lwâyi ku Difesto." Nenku mpindyewu aci cidî—cidî Didya dya diloolo dya Mwânà wa mukooko mu dyulu.

Mpindyewu tangilaayi: Didikungwija; ne Mukaji-musela; Difesto dya Mpungi, Didya dya Dibanji. Tukaadi bacimone mu bimfwanyi. Mpindyewu tangilaayi anu katanci kakese cyanaana kumpala kwa twètù kwoya. Monaayi. Tukaadi bacimone mu bimfwanyi.

¹⁶⁶ Mpindyewu, nwênù baswe kubala mu Maataayi 18.16, mMwambe ne: "Kudi basatu badi bafila bujaadiki," nwamonu's, mu Munsantu. . .mu Yone wa Kumpala 5.7, ne bikwabo. Isatu utu misangu yônsò anu bujaadiki. Ncyá bushuwa anyi? [Disangisha didi dyamba ne: "Amen."—Muf.] Ndishindika, cintu kampanda cidî cijaalame. Bantemu basatu badi bujaadiki. "Mukana mwa bantemu babidi anyi basatu, dîyî dyônsò dijaadikiibwe."

¹⁶⁷ Mpindyewu monaayi. Tudi bapete majaadiki asatu. Isatu yitu bujaadiki. Mpindyewu, tukaavwa bamane kupeta dyambwibwa misangu yisatu mu Dipungila Dikulukulu. Nuvwa bamanye aci anyi? Bu bujaadiki. Mpindyewu tangilaayi. Henoka uvwa mbumwe; Eliya uvwa mbukwabo; ne Yesu uvwa mbukwabo.

Yesu, mwikale Dibwe dya ntwangeenu, mpindyewu, Yêyè mmufile bujaadiki. Nwamonu anyi? Yêyè uvwa Dibwe dya ntwangeenu pankaci paa Dipungila Dikulukulu ne Dipyadipya, bwalu bivwa bikengela bwa Yêyè kwanji kufwa dyambedi kadi pashiishe kwambwibwa. Yêyè wakafwa; kwalukila ku mwoyi ne kwendakana neetu panwapa; ne pashiishe kwambwibwa. Bwalu, Yêyè uvwa Dibwe dya ntwangeenu divwa diswikakaje

bibidi abi pamwe. Paanyima paa dibiika ne dyambwibwa Dyende. . . Tangilaayi. Paanyima paa Yèyè mwenze cyôci aci, ne mujaadike cyôci aci, Dipungila Dikulukulu adi. Tudi bamanye twètù bônso ne Henoka wakatentemunyiibwa. Tudi bamanye ne Eliya wakangaciibwa muulu kudi mvunda, ncyá bushuwa, mu dikalu dya Kapyá. Ne Yesu wakafwa, wakajikiibwa, wakabiika ku lufu ne wakiikala ne mwoyi pa buloba apa, ne pasiishe wakambwibwa, Dibwe dya ntwangeenu adi. Mbôbô abu basatu, bwa kufila bujaadiki. Ncyá bushuwa anyi?

¹⁶⁸ Mpindyewu, kudi dyambwibwa dimwepele dikaadi dipite. Nudi bamanye aci anyi? Aci, twánjì tumonaayibi ne katwena mwa kucibalaku, lukasalukasa. Twangataayi Maataayi, nshapita wa 27. Nenu twangacilaayi lwà ku mvensa wa 45 wa Maataayi, nshapita wa 27. Twánjì tumonaayibi ne katwenaku mwa kupeta aci lukasalukasa, ne kumona ní—ní katwenaku mwa kupatula anu ndambu cyanaana mu cyôci eci, mufwanyine kutukwacishaku, lukasalukasa. 27.45, ngeela meeji, wùndì mufunde kaaba aka. Tubalaayaaku.

Mpindyewu kubangila pa dîbà diisambombo kwakalwa mîdimà mu ditunga dijima too ne pa dîbà dya citeema. . .

Nenu lwà pa dîbà dya citeema Yesu wakeela lubila lwà dîyì dikole, wamba ne: Eli, Eli, lama sabach- . . . ? mbwena kwamba ne: . . . Nzambi wanyi, wândekekèdì bwa cinyi?

Bamwe baa ku bavwa biimane mwaba awu abu, . . . paakumvwabo aci, ne kwambabo ne: Muntu ewu udi ubiikila. . . Eliya.

Nenu dyakamwe umwe wa kudibo wakaya lubilu, ne wakangata musukulampampa, ne wakawuujá ne mvinyo wa bwanji, ne wakawasa ku dilèngà, ne wakamupeesha yèyè bwa kunwaye.

Bakwabo abu baakamba ne: . . . lekelabi tumone ne Eliya ní walwa bwa kumusungila.

Yesu, paakeelaye lubila. . . lwà dîyì dikole, wakakuula. . .

“Dîyì dikole.” Dîyì dikole! Tangilaayi.

Yesu, pakaavwaye ufwa, paakeelaye lubila lwà dîyì dikole, wakakuula mwoyi.

Nenu, monaayi, cilàmbà cikudika cya mu ntempelu cyakapandika bipese bibidi kubangila kuulu too ne kwînshi; ne buloba bwakakanka, ne mbwebwe yakapandika;

Ne nkita yakabuululuka; ne yàbûngì ya ku mibidi. . . bansantu bavwa balaale tulu yakajuuka,

*Ne baakatapuka mu nkita paanyima paa dibiika
dyende dya ku lufu, ne baakabwela mu musoko wa cijila,
ne baakamwenekela bantu bààbûngì.*

169 Dyambwibwa dimwepele dyăpici.

Asatu akaadi menzeke mu Dipungila Dikulukulu, bwa bavwa badilongolole, bavwa Dîyì dya Mukalenge dilwe kudibo abu. Nwamonu anyi? Dîyì dya Mukalenge dyakalwa kudi Henoka. Dîyì dya Mukalenge dyakalwa kudi Eliya, muprofeta Wende. Nwamonu anyi? Dîyì dya Mukalenge divwa n'Yesu. Nwamonu anyi?

170 Tangilaayi mu Dipungila Dikulukulu, bansantu baa Dipungila Dikulukulu abu mpindyewu, paakenzeka dyambwibwa edi bwa musangu wa kumpala. Tangilaayi mvensa wa 50. Dîyì Dyende dikole adi dyakabiisha bansantu baa Dipungila Dikulukulu mushindu anu umweumwe menemene uvwa dîyì dikole adi dibiishe Yesu. . . anyi dibiishe Lazârò awu. Nwamonu anyi? Dîyì dikole adi ki dyakabiishangana.

Ne diibîdi ndyûle mu Tesalonika Mwibîdi, nshapita mwi4. Twănjàayi kubala, kucibala. Twafumu ku dibala, kukaadi anu tusunsa tukese cyanaana. Nwamonu anyi?

*. . . Ncyêna muswe bwa nwênù. . . bapange to, bânà
beetu, pa bidi bitangila aba . . . balaale tulu, bwa nwênù
kanwikadi mu cinyongopelu, bu mudi. . .*

Awu n'Tesalonika wa Kumpala 4.12 too ne ku 18. Aci, aci neciikale Dyambwibwa diibîdi. Dyambwibwa diibîdi nediikale dibakudiibwa dya Mukaji-musela ne diya nende.

171 Bansantu baa Dipungila Dikulukulu bakaadi bakabwele mu Bwikadi Bwende, mpaladiizo bamuumushe. Nenu bansantu baa Dipungila Dikulukulu bààkabànda, ku dîyì Dyende dikole adi, paakeelaYe lubila lukole ne kukuulaye mwoyi apu; bwalu (bwa cinyi?) Mulambu, difuta dya cibawu bwa mpekaatu yabo, divwabo bindilendile adi, biikale biitabuuja ne Mwânà wa mukooko mupwangane awu uvwa ulwa. Bavwa balambule Mulambu, Mwânà wa mukooko. Nenu paakafwaYe ne kukuula mwoyi, Wakeela lubila lwà dîyì dikole, ki bansantu baa Dipungila Dikulukulu kubiikabo.

Tangilaayi lubila ne dîyì kaaba aka, cintu cimwecimwe aci ku Dilwa Dyende. Nwamonu anyi?

“Wakakuula mwoyi.” Ne paakenzaYe aci, Mulambu uvwa mupwangane, ne mpaladiizo wakashaala munda mutupu. Nenu bansantu baa Dipungila Dikulukulu baakalwa cyakabidi pa buloba, baakendakana pa buloba, ne baakabwela pamwe Nende, dîbà dya dyambwibwa Dyende adi.

172 David mmwambe, mwaba awu ne: “Ambulukaayi, nwênù biibi bya kashidi; ne ikalaayi bambuluke.” “Wakakwata bupika

ku bupika, wakapa bantu mapà,” nenku bansantu baa Dipungila Dikulukulu baakabwela pamwe Nende.

173 Kwambabo ne: “Mfumu wa bwakane ewu nganyi?”

174 “Mukalenge wa Butumbi, wa bukole mu cilwilo.” Cilwilo cya bukole, ki bôbô bàlwalwà aba, benda benda lwendu lwa mindololoooci. “Yesu wakakwata bupika ku bupika,” nenku ki Yèyè ulwàlwa ewu, mwikale ne bansantu baa Dipungila Dikulukulu. Ki kuyaYe mu biibi bipyabipya bya muulu Mwamwa, ne kwamba ne: “Ambulukaayi, nwènù biibi bya kashidi; ne ikalaayi bambuluke; nenku shiilaayi Mfumu wa Butumbi mwaba abwele.”

Dîyì kufuminadi lwà munda mwamwa dyamba ne: “Mfumu wa Butumbi nganyi?”

175 “Mukalenge wa bukole mu mvita.” Biibi kuunzulukabi. “Nenku Yesu, Mucimunyi, wakakwata bupika ku bupika,” aba bàvwà baMwitabuuje, ne Dîyì dilwe kudibo abu. Mwaba awu, bansantu baa Dipungila Dikulukulu abu biikale balaale mwômô amu, bindile: “Wakakwata bupika ku bupika; wàkabànda Muulu,” kwangata bansantu baa Dipungila Dikulukulu abu ne kubwelaye. Ki Dyambwibwa dimwepele ndyôdi adi, dikaadi dimane kupita.

176 Dyambwibwa didi dilondà didi dyènzekà ndya (Tesalonika wa Mwibidi) Ekeleeziya, Mukaji-musela udi ne cya kubiika ku lufu, bwa kwambwibwa mu Butumbi awu adi. “Twètù badi ne mwoyi ne badi bashaale,” ayi mmibidi yidi mishaaale pa buloba, “katwakupangisha anyi kucyamakana badi balaale tulu to. Bwalu mpungi wa Nzambi neadile dyambedi, ne bafwe mu Kilisto nebajuuke.” Nwamonu anyi? “Ne twètù badi ne mwoyi ne badi bashaale netwangaciibwe muulu pamwe naabo.”

177 Dituku dikwabo, mvwa mwimane mu disangu dya mùsèsèsù. Nenku mvwa—mvwa mwimane mu—mvwa mwimane mu disangu dya mùsèsèsù mwikale mbandila cibilu cya lwendu lwa mindololoooci lwa Dituku dya Ditalala. Ne pakaavwalu lwenda lùbànda, lwenda lùbànda ne mùsèsèsù, mvwa mwimane mwaba awu ne mwanaanyi wa balume mutekete, Joseph. Kwakalwa, dyambedi, tutumba twa mvita twa kale twa mvita ya kumpala ki twakalwa mwaba awu, tutumba twa mvita tukese twa kale. Paanyima paa aci kwakalwa tutumba tunene twa mvita twa Sherman twa mvita mipyamipya, twikale ne mbungu minene ne mishiku yayi ya dipyapijilangana naayi midilu ayi, di—ditubu dya mushiku wa lubungu diikalepu, ne bikwabo.

Paanyima pa aci, kulwaku basalaayi; baa—baa—baamaamù baa Mutooto wa Ngòlò. Ne pashiishe kulwaku cishinyishinyi ciikale ne...kwinshi aku...Ee, kwinshi aku kulwaku cishinyishinyi kampanda, ne lwà kumpala kwaci aku kuvwa musheete wa bafwe ne, “bwa musalaayi udi kayi mumanyike.” Nenku kuvwa kwimane mu—musalaayi mwimane mwaba awu,

mulami wa ku lukita. Kuvwa kwimane mwaba awu musalaayi wa pa masuwa a màyi ku luseke lukwabo aku, ne mwendeshi wa masuwa ku lûngà luseke. Nenku kuvwa cilàmbà cikudika cizola. Ne ku luseke lukwabo kuvwa maamù wa Mutooto wa Ngôlò musòmbekù. Úvwa mufwishe mwanende wa balume. Kuvwa mukaji mutekete mwimane mwaba awu, ne mutu muteeka pa meesa, udila mwadi. Kànà kaa balume katekete kavwale mbondya kasòmbè ku luseke aku; ne binsonji bikatunkumuka mu mèsù. Kavwa kafwishe papa waku.

Mêmè kudyambidila ne: “Dibungama kaayi’s we! Nyewu ndi mwimane apa ntangila, mbamona, basalaayi bakulumpe baba, anu ndambu mukese cyanaana mbàvwà bashàle; benda lwendu lwa mindololoooci kwaka, balema ne bakulumpe, mushindu wawa, bavwale bilàmbà byabo bya kumwekumwe abi, kadi biikale babileeja patooke ne maleela ônsò anu ne bwalu mbeena Amerike.”

Mêmè kudyambidila ne: “Kaa, Nzambi wanyi!”

¹⁷⁸ Dituku dikwabo, nekulwe dikubakuba difumina mu Dyulu: “Ne bafwe mu Kilisto nebabiike dyambedi.” Bansantu baa kale baa Dipungila Dikulukulu badi dyamwamwa abu, badi bindile abu, nebalwe bu dikubakuba ne nebapatukemu dyambedi, ne nebabwele mu dibiika dya ku lufu. Netubwele buludi mu mulongo awu, tuya tukabwela mu dyulu; mibidi mikulakaji ya cifwaka eyi mishintuluke ne mivwijiibwe mifwanangane ne mubidi Wende Yèyè mwine wa butumbi awu. Ndwendu kaayi—kaayi lwa mindololoooci’s we lwikala mwa kwenzeka paabangawu kuya mutangile mu dyulu, dimwe dya ku matuku adi panshi aa, mu cikondo cya dyambwibwa cidi cisanganyiibwa kumpala eku eci, kaa, biikale baleeja patooke ne maleela ônsò Mashi a Yesu Kilisto pa byâdi byabo, Mukenji wa Nzambi wa mu dituku divwabo ne mwoyi. Ki dibà ditudi bindile ndyôdi adi, mwaneetu.

¹⁷⁹ Tangilaayi, anu bwa kujikija mpindyewu. Dibiika dya ku lufu diibîdi, ônsò...Dya kumpala dikaadi dipite. Diibîdi dikaadi pabwîpi, mpindyewu mene, nediseemene mpindyewu.

¹⁸⁰ Mpindyewu, diisâtù ndya bantemu babidi baa mu Bwakabuulwibwa 11.11 ne 12 abu. Bidi ne, bôbò aba ki biikalà mwa kwalukila, ne Nyuma wa Kilisto, bwa kufila bujaadiki kudi beena Yuda, bu mwakafila Yozefu kudi bânà baabo. Kadi vulukaayi ne: “Mibidi yabo mifwe ayi yakashaala milaadika panshi mu mùsèsù, munda mwa matuku asatu ne citupa. Pashiishe nyuma wa mwoyi wakabwela munda mwabo, ne baakambwibwa, bangaciibwe muulu mu Dyulu.”

Ki mambwibwa enu asatu a Dipungila Dipyadipya ngôwò awu.

Mambwibwa asatu a Dipungila Dikulukulu; ônsò awu mamane kupita.

¹⁸¹ Mpindyewu tudi badilongolole, bindile mambwibwa, Dyambwibwa dya bansantu. Dyamanyi kwambiibwa, nenku nebyenzeke nanku. Padi Nzambi wamba cintu kampanda: “Maulu ne buloba byònsò nebijimine, kadi Dìyì adi kadyadyakupangilaku to.”

¹⁸² Paakamba Nzambi, kale wawa mu Genese 1, paakambaye ne: “Bukènkè bwikalèku” apu, kuvwa kufwanyine kwikala kupite nkama ya bidimu kumpala kwa kaabukènkè kampanda kwikalaku. Yèyè kwamba ne: “Dibwè dya ngaji diikalèku. Muci wa nsanga wikalèku. Cipeela ciikalèku. Mukuna wikalèku. *Cikampanda* ciikalèku.” Yèyè ngwàkacyàmba, nudi numona’s. Nenku bu mukaavwaci anu cimane kupatuka mukana Mwendé, mu Dìyì kampanda, civwa ne cya kumweneshiibwa. Cidi ne cya kwikalaku. Pavwa . . .

¹⁸³ Pashiishe dituku kampanda, Yèyè wakabiikila cisamba Cyende bwa kupatukaci. Nenku Yèyè ukaavwa mwakule ne muntu dìnà dyende Mòsà, ku Dikunji dya Kapyà, Bukènkè; Kapyà kaa Cijila, Kansantu. Ne Mòsà kavwaku mufwanyine. . . Bantu kabavwa bafwanyine kwitabuuja Mòsà to, kadi Yèyè kwamba ne: “Patuka naabo ubafikishe ku mukuna ewu.”

¹⁸⁴ Mu dinda adi, mukuna uvwa wònsò mùle tente ne Kapyà, ne kuvwa mikenyi ne mikungulu mushindu awu. Ki bantu kwambabo ne: “Nzambi kaakulu to. Mòsà akule yèyè,” nwamonu’s, “bwa katulu kufwa.”

¹⁸⁵ Nzambi kwamba ne: “Mèmè ncyakwakula kabidi naabo mushindu ewu to, kadi Nèmbàjuudilè muprofeta. Nenku Mèmè nèngààkwilè kudiye yèyè, ne cyambaye yèyè aci necyenzeke. Pa dîbà adi, nuCiteelejaayi, bwalu Mèmè—Mèmè ndi nende.” Mpindyewu, Yèyè ngwàkamba aci. Wakamba ne necyenzeke.

¹⁸⁶ Tangilaayi muprofeta ewu, Yeshaayi, mwimane mwaba awu; muntu wetu ewu, muntu wa meeji, muntu uvwabo batwa mushinga, ee, kudi mfumu, bwalu uvwa musòmbe ne Uziya. Mfumu awu, mwikale muntu munene, wakateeta bwa kwangata kaaba kaa muyiishi, musangu kampanda, nenku yèyè kubwela, kukwacikaye nsudi.

Ki cyòcì aci cîmvwà mwambile beena kantu-ku-byanza. Kuteeciku kwangata kaaba kaa muyiishi to. To, mukalenge. Shaala wèwè kaaba kaudi aku. Nwamonu anyi? Enza webe mudimu, cidi Nzambi mukuteekele, mukwambile bwa wèwè kwenza aci. Pawikala munu, kwèna mwa kwikalaku dici to. Pawikala dici, kwadyakwikalaku dyùlu to, dyùlu anyi dîsù. Nwamonu anyi? Shaala wèwè anu pa kaaba keebe.

¹⁸⁷ Nuvwa bumvwe Diyiisha adi, dituku dikwabo, ku tudyomba ne: *Kuteeta Bwà Kwenzela Nzambi Mudimu*. Davidi, mfumu mwela maanyi. Bantu bònsò beela mbila batuuta mikobolo ne: “Civwa cîmpè.” Kadi yèyè kavwaku mukonke muprofeta wa Nzambi to. Kadi muntu kufwaye, ne cintu cyònsò e

kunyangukaci. Kuteeci bwa kwambulwisha Nzambi to. Indila too ne piikalaci cikumbanangane ne mishingà ya Nzambi. Lekela cilwe mu Wende mushindu wa dicyenza. “Nêmbangè cintu cinene *kampanda*. Necyènzè *cikansanga*.” Watapa ntaala wadimuka, mwaneetu.

¹⁸⁸ Mpindyewu, Davidi’s uvwa mumanye bîmpè bitambe. Natana uvwa mu ditunga amu, mu diine dituku adi. Kabàvwakù nanshà bamukonke to, nansha kakese. Nwamonu anyi? Yèyè wakakonka tupiteena twa masalaayi nkama ne twa binunu. Bantu bônso kwelabo mbila, ne kutuutabo mikobolo, ne kujabo maja. Pamutu paa . . . Bavwa bônso ne bikemu bya ntendelelu abi, kadi aci kacivwa mu njila ne ndongamu wa Dîyî dya Nzambi nansha, ki kupangilaci.

Cintu cikwabo kana cyônso, padici kaciyi mu njila ne ndongamu wa Dîyî dya Nzambi to, necipangile. Anu Dîyî dya Nzambi ki dyashaala kashidi. “Maulu ne buloba nebijimine, kadi bwa Dîyî Dyanyi to.”

¹⁸⁹ Monaayi Yeshaayi, nsongaalume wa meeji awu mwimane kaaba aku. Dyakamwe, Nyuma kumulenga. Yèyè kavwaku mwa kwamba bishiilangane to. Úvwa muprofeta. Kwambaye ne: “Monaayi, nsongaakaji virgo neimite difu.” “Mbatulelele Mwânà wa balume; mbatulelele Mwânà, Mwânà wa balume mmufidiibwe. Dînà Dyende nedibiikidiibwe ne Mubedyanganyi, Mfumu wa Ditalala, Nzambi wa Bukole, Taatù wa Kashidi. Ndekeelu wa . . . Bwende bukalenge nebwikale pa makaaya Ende. Ndekeelu wa . . . Kakwakwikala ndekeelu ku Bwende bukookeshi nansha.” Mmunyi muvwa muntu awu mufwanyine kwamba ne meeji ônsò muvwa nsongaakaji virgo mufwanyine kwimita difu?

Muntu ne muntu kukebanganaye naaci. Cikaavwa cimana kwamba. Civwa ng’EMU MMUDI MUKALENGE WAMBA. Civwa ne cya kwenzeka, bwalu civwa n’Dîyî dya Nzambi. Bya mwomumwe anu ne mùvwàbi mu Genese, paakakunaYe mamiinu awu mwinshi mwa mbû apu, muvwa “buloba kabuyi ne mbungakeenu, bwikale butupu; ne mâyi pamutu paa ndondo.” Nwamonu anyi? Civwa ne cya kwenzeka. Ki dîngà dituku, bidimu nkama mwandamukulu bimane kupita, difu dya nsongaakaji virgo kwimitadi Dimiinu dya Nzambi, Dimiinu difûkîibwe. Yèyè kulela Mwânà wa balume.

¹⁹⁰ Mwânà wa balume umweumwe awu e kwimana pààpa, dîngà dituku. KwambaYe ne: “Lazàrô, patuka.” Ki muntu uvwa mufwe kukaavwa matuku anaayi, mubole, dyûlù dyende dimane kubeetelela, dyupuke, kupatukaye. KwambaYe ne:

*Kanukemi bwa eci nansha: bwalu dîbà dilwalwa,
(Amen.) dîkalà bônso badi mu lukita mwa kuumvwa
dîyî dya Mwânà wa Nzambi,*

Pa nanku, cikaadi cimane kwambiibwa. Cidi ne cya kwenzela mushindu awu. Nekwikale Dyambwibwa. Kaa, ekelekele!

¹⁹¹ Ndi mvuluka, anu Diyiisha dyanyi dya ndekeelu mu Californie, mûmvwà ndyambidila ne ncyadyakumwalukilaku kabidi to, pâmvwà mudyanjile kwamba ne: “Los Angeles neätukinë mwinshi mwa mbû. EMU MMUDI MUKALENGE WAMBA.” Neätukinë. Kwende nkumane kujika. Mmumane kukupudiibwa. Bwende mbutuuke. Ndîbâ kaayi diine adi? Ncyêna mumanye ne ndîbâ kaayi to, kadi yêyè neatukijiibwe. Dyakamwe paanyima paa cyôci aci, dikanka dya buloba kubangadi kunyukusha bikole ne kubendamija.

¹⁹² Vulukaayi ne, bààbûngî baa kunudi biimane anu mwaba awu, lubwebwe alu, dituku adi pavwa Mwanjelo mutuuluke mwaba awu apu. Ne Bukênkè abu ne Kapya bimata bifumina mu Dyulu, ku nyungulukilu wa lubwebwe lutuvwa biimanyine alu. Mbwebwe yituuka ku mikuna, ne yimata kwônsò aku. Cyôci kutuuta makubakuba misangu yisatu, makole. Mêmè kwamba ne: “Dilumbulwisha nedituute Côte Ouest.” Matuku abidi paanyima paa ciine aci, Alaska kwambaye kutukina mu mâyi.

¹⁹³ Vulukaayi ne, Nzambi umwèumwè udi mwambe cyôci aci awu, mmwambe ne: “Los Angeles ngwa kabutu.” Ne kwende nkujike. Ncyêna mumanye ne ndîbâ kaayi to. Ncyêna mwa kunwambila to.

¹⁹⁴ Mêmè ncivwa mumanye ne ndi mwambe ciine aci to. Kadi mwaneetu wa balume ewu, ngeela meeji ne civwa . . . To. Umwe wa ku bakwâ-Mosley, ngeela meeji, uvwa naanyi pambelu pàapa mu mùsèèsù kampanda. Ncivwa mumanye ne civwa ncinyi to too ne pângàalu kukenketa. Mêmè kukenketa mu Mifundu.

Ne Yesu uvwa mwambe ne: “Kaa penuma, Kaa penuma, mmisangu bûngî kaayi . . . Wèwè udi mudibandishe awu . . .” (eyowa’s we) “. . . too ne mu Dyulu, neupwekeshiibwe too ne mu iferno. Bwalu byenzedi bya bukole bidi byenjiiibwe mwebe emu ebi, bu byenjiiibwe mu Sodoma, nunku’s mmushaaleku too ne leelu ewu.” Nenu bidimu bitwe ku lukama ne makumi ataanu kuumukila kwine aku, (Sodoma ukaavwa, mu buloba) pashiishe Kaa penuma ukaadi mu mâyi, yêyè pende, leelu ewu.

¹⁹⁵ Ne Nyuma umwèumwè wa Nzambi udi mwambe bintu byônsò ebi, ne mwenze bintu byônsò ebi awu, n’Yêyè wákamba kwaka awu ne: “Kaa, wèwè cimenga, Kaa penuma, udi mudînyike dîna dya Banjelo awu, Los Angeles, mushindu mwine wûdi mudibandishe too ne mu dyulu’s we! Muji mene ne nkwaswa wa Sataana,” (Nwamonu anyi?) “udi mudibandishe.”

¹⁹⁶ Bambi anyi, s’ki mu yabo nkita mmwômò amu. Bantu bîmpè bayaayamu ne bakafwilamu bu mpuku. Dinyangakaja kaayi dya maalu’s we!

197 “Wêwè udi mudĩnyike dĩa dya Banjelo awu; bu byenzi bya bukole ebi byenziibwe mu Sodoma, bidi byenziibwe mwebe wêwè emu ebi, nunku’s mmushaale too ne leelu ewu. Kadi dyebe dĩa dyákányi.”

Nutangilaayi bwa numone. Cyôci kacyi aci to, ndi muprofeta wa mashimi. Nwamonu anyi? S’ki yêyè awu. Ukaadi mulaalemu.

198 Ndi mvuluka diloolo adi, kumpala kwa mêmè kumona ciine aci, ngâkamôna didyanjila-kumona dya Mukaji-musela. Mvwa mwimane mwaba awu ne mêmè kumona inâbânzâ mutekete mulenga kwîsù, muvwale mvwadilu anu mujaalame, ne bikwabo, wenda lwendu lwa mindololoooci uya mu *nunku*. Kuvwa Kampanda mwimane ku luseke lwanyi, mu cikeena-kumona amu. Ki mêmè kumona. Baakamba ne: “Didyanjila-kumona dya Mukaji-musela.” Mêmè kuMumona upicila ku luseke lwanyi aku. Bavwa balwila ku *elu* luseke, biikale baya banyunguluke.

199 Mêmè kucyumvwa cilwa cibânde, eke—ekeleeziya miikale yenda yibanda yumukila ku luseke lukwabo *elu*. Ki ekeleeziya wa Asie ulwâlwa wawa. Kaa, nwênù bâmbambâ bwa bukooya’s we! Ki ekeleeziya wa beena ku Mputu ulwâlwa ewu. Kaa, kekelelele! Ki pashiishe mêmè kuumvwa mijiki ya bidündadûnda yenda yilwa, yivwa m’Mandemwazele Amerike, ekeleeziya, wa bwalu kayiku ne bilâmbâ pambidi nansha bya kânâ to. Úvwa ne mabeji, bu mudi bibejibeji, bikunzubile, bikwacila lwâ kumpala kwende aku, wenda uja maja a bidündadûnda; Mandemwazele Amerike, ekeleeziya.

200 Mvwa mwimane mwaba awu mu Bwikadi Bwende. Mêmè kudyambidila ne: “Éyì Nzambi, mêmè bu mwambi, piikalabi ne ki cyôci aci cidi citambe bwîmpè citudi peetu bafwanyine kwenza? Kaa! Kaa!” S’udi anu mumanye mùdi udyumvwa. Pashiishe mêmè kudyambidila ne: “Nzambi, nsokòkèku. Ngikalakù nanshâ anu ne mushindu wa kuumuka mwaba ewu. Piikalabi ne cyônso citudi benze, ne cyônso cituvwa ne cya kupatula ncyôci aci, piikalabi ne ncyôci aci?”

201 Ne pashiishe paakapicila bakaji abu mwaba awu, biikale bônso benza bintu bya batwa kumpala batwa paanyima abi ne bikwabo, ne nsuki mîpì, ne kwîsù kulaaba bilaabu aku. Ne pavwabo bapicila mwaba awu mushindu awu apu, paabo’s ne cya kwikala baavirgo bwa Kilisto. Nenku paakapicilaye mwaba awu mushindu awu, mêmè kutuma mpala mu cisuku, nudi bamanye’s, mwikale ne *eci* cikwacila lwâ kumpala kwanyi. Bivwa—bivwa bya bundu be, nyima wabo awu. Nenku ki bôbô abu’s, benda baya mushindu awu. Ki mêmè kutuma mpala mu cisuku, mufwile mu mwadi, mushindu *ewu*.

202 Mêmè kwamba ne: “Ncyêna—ncyêna mufwanyineku kucitwala mwômò amu to. Yêyè mwinane apu, ne mêmè

mumanye ne mêmè ewu, mwambi wa Ekeleeziya, ne ki cîndiku mupatule bwende Yèyè ncyôci aci.” Mêmè ne: “Éyi Nzambi wa yaaya, ncyêna mwa kucitangilaku to. Ndekèlèku mfwe. Ndekèlèku—ndekèlèku njimine,” ne mushindu awu.

²⁰³ Nenku pavwaci anu ne cyâpâtuku cyâyi, musangu wônsò ùvwà yônsò wa kudibo mufwanyine kulwa awu, bavwa mwa kupatuka kuyiila mu mwaba kampanda, ne pashiishe bapatuka mu dikàsà. Mvwa anu mwa kuumvwa mwadi wa cyôci aci pavwaci ciya apu.

Pashiishe mêmè kuumvwa cintu kampanda bu cya ne *Ndàayi Kumpàlà, Màsàlaayi À Beena Kilistò*. Mêmè kutangila, kadi ki musumbà wa nsongaakaji ya cijila ayi ùlwalwà ewu anu menemene mushindu uvwabo awu, bavwale bônsò mvwadilu mujaalame, nsuki yabo mibalembelele paanyima. Bakàlàngà, baa mankenda, benda benda mushindu *ewu*, mu dikàsà dya Evanjeeliyo. Yèyè uvwa Dìyi. Bavwa ne mmwenekelu wa umwe wa ku ditunga ne ku ditunga dyônsò. Mvwa nci tangila pavwabo bapicila mwaba awu apu, ne mêmè kubamona pavwabo bapicila mwaba awu. Pamutu paa kupwekabo batangile panshi, bôbò e kubanga dibànda muulu.

Mêmè kumona umwe wabo uteeta, babidi anyi basatu baa kudibo, bateeta kupatuka mu mulongo. Mêmè kwela lubila lukole ne: “Shaalaayi mu mulongo!” Ki cikeena-kumona kunguumukaci. Nenku mvwa mwimane mu cibambalu amu, ngeela mbila ne: “Shaalaayi mu mulongo!” Mulongo, Cyôci aci.

²⁰⁴ Ndi ndikonka ne, ncifwanyine kwikala cikaadi cipite anyi? Mukaji-musela mmufwanyine kwikala ukaadi mumane kubiikidiibwa anyi? Ki cyôci citudi munkaci mwa kupicila leelu ewu eci anyi?

Bidi bikengela Yèyè ikale mufwimba ne mwenza mu cimfwanyi cya Kilisto, ne Kilisto n’Dìyi. Ki cintu cimwepele ncyôci aci. Nwamonu anyi? Cidi Mwômò amu, mu Dìyi amu. Cidi an-...Nwamonu anyi? Kakwena mwa kwikala kantu nansha kamwe kasakidila to. Kacyena mwa kwikala muntu mu—mukaji mwikale ne cyanza bu muntu, kadi cikwabo cyanza ciikale dikama bu dya mbwa to. Bidi bikengela ciikale anu menemene Dìyi dya Mukalenge, bu mudiYe Dìyi. Mukaji-musela udi citupa cya Mubaki. Mukaji udi citupa cya bayende, bwalu mmupatudibwe mu bayende awu. Eva uvwa citupa cya Adama cyangaciibwe mu lubadi lwende. Nenku ki mudi kabidi Mukaji-musela, kayi mwangaciibwe ku dingumba nansha, kadi mwangaciibwe mu cyâdi cya Dìyi dya Nzambi bwa dituku edi.

²⁰⁵ Dyambwibwa!

Mpungi wa Mukalenge neadile, bafwe mu
Kilisto nebajuuke,
Ne baabanyangana butumbi bwa dibiishiibwa
Dyende;

Paadisanga basungudiibwe ku Cisòmbelu
cyabo dyamwamwa dya dyulu.

Paabiikilabo mènà mwamwa muulu, tuteetaayi bònso bwa kwikalaMu, nwènù balunda baanyi. Nzambi anubeneshe.

²⁰⁶ Cyamanyi kwambiibwa. Cidi ne cya kwenzeka. Necyenzeke. Nenku tukese...[Katupa kaa mukaba wa mèyi munda mutupu—Muf.]

Nwènù bantu, kakwena muntu nansha umwe udi muswe kufwa to. Kakwena muntu nansha umwe udi muswe ku—kujimina to. Ndekelaayi nzwàmbilè. Cyònsò cyùdi wèwè wenza...Mushindu wùtù uya mu ekeleziya nansha mwikale mulenga wa bishi, ne wùtù ne lulamatu kudi ekeleziya. Aci cidi cîmpè; kakwena cilumbu bwa cyôci aci to. Bivwa bikengela wèwè kwikala uya mu ekeleziya. Ikala wenza aci. Tungunuka ne kwikala kuya mu ekeleziya. Kadi, nansha nanku, imansha anu bilele byebe abi kule, ne tungunuka nda anu kumpala ubwele mu Kilisto. Bwalu, mpungi neadile dimwe dya ku matuku adi panshi aa, ne neupapuke ukaadi ne cimanyinu cya nyama wa lwonji cikutwa, ne kuyi umanya ne ncinyi ciine aci to too ne piikala dîbà dikaadi dimane kupita. Aci ncyà bushuwa menemene.

²⁰⁷ Nzambi anubeneshe. Nwamfwilaayiku luse bwa mûndì munulame. Kadi vulukaayi. Ndi mubalame ntanta mupitepite bule mwaba ewu. Ncyà bushuwa. Nenku mulambu unudi bansangishile awu...Wa bwalu, ncivwa mulombe bwa nwènù kwenza cyôci aci to, mwaneetu. Aci's cidi, ekelekele, nngenzelu wa maalù wa bukalanga. Angata cyôci aci ufute nzubu wa cilaala-beenyi ewu bwa mēbà a—a pamutu awu, bwalu mēmè ngudi muàpicìshe. Ncicivwa anu ne ndambu wa maalù mwaba ewu. Ncicidi anu ne mabeji makwabo matwe ku mwandamukulu anyi dikumi pa bwalu bwa Dyambwibwa adi, kadi nci—ncivwa anu mupete cikondo cya kubyamba to. Nzambi anubeneshe.

²⁰⁸ Nudi banange Mukalenge Yesu anyi? [Disangisha didi dyamba ne: “Amen.”—Muf.] Twǎnjì twimanyinaayi anu kuulu bapuwe bwa katanci kakese cyanaana mpindyewu, ne ditalala dyònsò, ne kaneemu kònsò, bwa kuvulukaku bîngǎmbì ebi. Vulukaayi ne, tudi mu mēbà a ndekeelu.

Matunga aa adi akosoloka, Izaleela udi utabuluka,
Bimanyinu byakadyanjila Bible kwamba;
Matuku a baa Bisamba bya bende mabala,
mùle tente ne bintu bya bikwacisha bwôwà;
“Alukilaayi, Nwènù badi batangalake, nuye kwenu nwènù.”

Dituku dya bupikudi dikaadi pabwîpì,
 Myoyi ya bantu yidi yamba kwimana bwa
 bwôwâ;
 Ujiibwayi ne Nyuma, myëndù yenu
 milongolola ne misukula,
 Bandulukaayi, bupikudi bwenu bukaadi
 pabwîpì.

Nudi bamanye aci anyi?

Baprofeta baa mashimi badi bashima, badi
 bavila Bulelela bwa Nzambi,

Twêtù tudi bamanye ne byônsò abi mbilelela. Kî mmwômò
 anyi? [Katupa kaa mukaba wa mēyì munda mutupu—Muf.]

Ndi muMunange, ndi muMunange
 Bwalu Yèyè wakannanga kumpala
 Ne wakampetela lupandu
 Pa mucu wa Kalvariyo.

²⁰⁹ Mbanganyi badi baMunange bulelela? Ela cyanza cyebe
 muulu. Mpindyewu, ndi muswe ne wèwè, patudi twimbulula
 cyôcì aci apa, ulabule muntu kampana udi pabwîpì neebe awu
 ku cyanza. Amba ne: “Nzambi akubeneshe, mwena lwendu.”
 Twêtù aba’s tudi beena lwendu. Kî mmwômò anyi? [Disangisha
 didi dyamba ne: “Amen.”—Muf.] Beena lwendu ne beenyi.

Ndi muMunange,

Ki mudibi nanku, anu dyamwamwa dya meesa adi.

Ndi muMunange
 Bwalu Yèyè wakannanga kumpala
 Ne wakampetela lupandu
 Pa mucu wa Kalvariyo.

²¹⁰ Nudi baswe kuya mu Dyambwibwa anyi? [Disangisha didi
 dyamba ne: “Amen.”—Muf.] Mbanganyi badi diya dya mu
 Dyambwibwa dibasankisha? Amba ne: “Nzambi, ndi muswe
 kuyamu, ne mwoyi wanyi wônsò.”

Kwàta Ku Cyanza Cyà Nzambi Cidì Kaciyi Cishintuluka,
 nutu bamanye musambu awu anyi? Udi muwumanye anyi,
 mwaneetu wa bakaji? *Kwàta Ku Cyanza Cyà Nzambi Cidì Kaciyi*
Cishintuluka. Ncyêna mumanye cidì . . . Cyona cidì bishi, bwa
 awu awu? Huh?

Kwata ku cyanza cya Nzambi cidì kaciyi
 cishintuluka!
 Kwata ku cyanza cya Nzambi cidì kaciyi
 cishintuluka!
 Ibakila ditekemena dyebe pa bintu bya
 Cyendeleele,
 Kwata ku cyanza cya Nzambi cidì kaciyi
 cishintuluka!

Nudi banange aci anyi?

Piikala lwendu lwetu lukaadi lujike,
Pawikala ne lulamatu kudi Nzambi,
Cisòmbelu cyebe cilenga cya cibalakana mu
Butumbi,
Ki cyamona musuuka webe mwambwibwe
awu!

Kwata ku cyanza cya Nzambi cidi kacyi
cishintuluka!
Kwata ku cyanza cya Nzambi cidi kacyi
cishintuluka!
Ibakila ditekemena dyebe pa bintu bya
Cyendeleele,
Kwata ku cyanza cya Nzambi cidi kacyi
cishintuluka!

Ndi muswe bwa nwinyike mitu yenu katanci kakese
cyanaana mpindyewu.

Kwalakanyi mabanji a patupu a buloba ebu,
Àdi anyanguka lukasa aa to,
Keba bwa kupeta cibucilu cya mu Dyulu,
Abi kabyakujiminaku to!

Kwata ku cyanza cya Nzambi cidi kacyi
cishintuluka!
Kwata ku cyanza cya Nzambi cidi kacyi
cishintuluka!
Ibakila ditekemena dyebe pa bintu bya
Cyendeleele,
Kwata ku cyanza cya Nzambi cidi kacyi
cishintuluka!

²¹¹ Ne mitu yenu miinyika, biikale ne cyôci eci mu meeji, bamanye ne tudi twinyika mitu yetu bayitangije ku lupwishi kutwakangaciibwa, dîngà dituku ki kutwapîngana, mwikale mumanye ne udi ne musuuka munda amu wikalà ne cya kuya kalumbulula kudi Nzambi. Nenu pawikala udyumvwa ne kwêna anu mudilongolole bwa Dyambwibwa adi to, bu Dyôdi mwa kulwa diloolo edi, kadi mwikale ujinga bwa bakuvuluke mu disambila, ela wêwè anu cyanza cyebe muulu cyanaana. Katwena ne kaaba kaa kwenzela dibiikila dya ku cyoshelu to. Cyoshelu cyebe cidi munda mwa mwoyi webe amu, nansha nanku. Ela cyanza muulu. Nzambi akubeneshe, wêwè, wêwè. Ekelekele!

“Ndi ndyumvwa ne ncyêna mudilongolole to, Mwaneetu Branham. Ndi—ndi, mu bushuwa bwa bwalu, ndi—ndi—ndi muswe kwikala mwena Kilisto. Ndi muteete kwikala nanku, kadi kudi anu cintu kampanda cipangike. Ndi—ndi mumanye ne ncyê—ncyêna anu mwaba uvwa ukengela mêmè kwikala to.”

“Mfwileku luse, Nzambi. Nyewu ngeela cyanza cyanyi muulu. Ikalaku naanyi luse.”

Mpindyewu, byanza bitwe ku makumi abidi anyi makumi asatu, mbikaadi byediibwe muulu, mu kasumbu kakese aka. Bikwabo nyawu byenda byediibwa muulu.

²¹² Nzambi munanga, Wêwè ngudi mumanye cidi paanyima paa cyanza aci, munda mwa mwoyi amu. Nyewu ndomba, Nzambi munanga. Kudi cintu anu cimwepele cîndi mêmè mwambule bujitu bwaci, ncyà ne, kwamba Bulelela. Nenu, Nzambi munanga, bôbò mbaswe kusungidiibwa. Mbaswe nanku, cya bushuwa. Bôbò—bôbò kî mbaswe cintu kampanda cidi anu disaluka pa cyôdi eci nansha, cintu kampanda cikwatakaja, ndongolwelu kampanda wa cyena mangumba, twitabaayi kampanda, dîyi diswika kampanda didibo basakidile. Bôbò mbumvwe, Taatù, ne bidi bikeba Dîyi dya Nzambi dikezuke, kadiyi disambakaja to. Bikwabo byônsò nebijimine, nansha mauu ne buloba, kadi Dyôdi kadyakujimina to. Nenu twêtù biikale Dîyi adi, buloba nebijimine mwinshi mwa makàsà etu, kadi twêtù katwena mwa kujiminaku to, bwalu tudi Dîyi adi, Mukaji-musela wa Mubaki.

²¹³ Ndi ndombela muntu ne muntu, bwa Wêwè kubenzelaku nanku, Taatù, ki disambila dyanyi dya meeji matooke ndyôdi adi. Nenu umfwileku luse, Taatù, bwa diikala mubinduluke bikole diloolo edi, mulwe mwaba ewu pashiishe, ne—ne miikale nzakalala, ne ngamba mêmè makosolokangane ne miikale tutupa tutupa. Mu mushindu kampanda anyi kansanga, Nyuma Mwîmpè munene, waàtwàngajakù mu Webe mushindu Wêwè wa Nzambi awu, ne waàfila mu mwoyi ya bantu, kuumukila mu wanyi mwoyi, ne kabingila ne kiipacila kândi mêmè naaku mu mwoyi wanyi kûdi Wêwè. Kwèna Wêwè mwa kuswaku nanku anyi, Mukalenge? Nenu sungilaaku udi mwa kusungidiibwa awu. Umukoke kûdi Wêwè, Mukalenge. Ne swaku bwa twêtù kwikala badilongolole bwa dîbà dya dyambwibwa didi pabwîpî menemene adi. Bwalu ndi ndomba nanku mu Dîna dya Yesu. Amen.

Nzambi anubeneshe.

Mpindyewu, mulombodi wa ci—cibilu.



DYAMBWIBWA LUA65-1204

(The Rapture)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisambombo diloolo, mu matuku 4 a ngondo wa dikumi ne mwibidi, cidimu cya 1965, bwa didya dya Bwobumwe bwa Buloba bujima bwa Beena Kantu-ku-Byanza baa Evanjeeliyo mu Kaabujima ku Ramada Inn mu Yuma, Arizona, U.S.A. Ndyumusha pa mukaba wa mēyì ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org